

# Polgo Hasia Pas Deli Korin Dabeba Aseani

## Hasia nedebo tau sabo po

Polobadu te bidi Pol bidali sogo, aga digi te bulu Korin genuai taun me deli te provins tɔ pedai Akaia bulude te Grik dabego moni tɔ pedai tomoba pelama, tama te moni genuai hanu Korin teba sabolama, tama Kraisi Jisasgo po te Korin we bidi dabebolo pusali. Te Korin hanu dwai nogi elaluali, te dwai dwai penani se ebo hanu wai, tama tibo god hauwa tede elaluali. Te Korin we bidi mebage te Godigo po bugagia odali. Tama nosali Pol aga te gasa hanu nogi Efesus tede bidibadi, agai e pas te Korin bagebolo aseana tolali. Agai odali, te hani augwa hasi tomode pebeda pali. Tama bidi me deligo dwai penani se yali. Tama te Korin bage augwaligo pas te Polba aseana toloyu, tama haniani kolesaga ebode te augwaligo aga po hanalu wali. Tama Pol agai te hanalu wali po wei ponoyu, tama aga homu me Godigo homu dali si augwalibolo pusa mani.

Polgo moni homu te Jisasgo po wali pabo te Korinde bidalubo we bidide yali, tiyu augwaligo konealubo homu daɣ wabo te bomu kimi meni dali weyu yali. Tama augwaligo wiegi yai kolesaga yali te dolidali homu yai. Agai te we de bidi si deliba dagana selama bidu ebo te doloba pai kolesagade po weyu, tama te sege dabe pedalubo si te Godigo Tedali Mobo Bidigo te augwali bilibo dodolomainu yabo po weyu yai. Agai te lotu wabo wiegi yai kolesaga ebo po me te haniani gasagi yai homu kolesaga te Tedali Mobo Bidigo te Jisas wali pabo bagede ebo po wali. Tama me te isali bidi dabe ma hodalueibao po wai dao.

Te tama tigidali se dabego te Korin dabeba sege mobaso, te bidi Polgo te wiegi yai mu pogo te augwali tau somainu eyu te Godigo ebo homu kolesaga konemainu yali. Te e bukude daɣ me badude te Genuai Bidi wali pabo bagego homu godolo ebo po te buku Daɣ 13 tede te po elalubao. Te daɣde te tiwai po te gasa bidi hasi homu godolo ebo po wali elalubao, te hasia mu Godigo aga we bidi dabeba mani homu kolesaga te dao. Dago te tama kolesaga wali pabo usu dao.

## Te Genuai Bidigo po wali pabo bagego augwa digi augwa nogi ugaba sabo konila po me olamuo po wai

(Daj 1-4)

**1** <sup>1-2</sup>Ena Pol da, tama Godigo digi aga homugo konea pelama tama agai ena i olama, te Krai Jisasgo tagala palali bidi şeba muani. Ena dali dago ama Sostenes dadi sigo e pas te dage Korin moni hanude bidalubo Godigo we bidi hanibolo aşena tolobao. Dage te Godigo dwai şe me işabo wiegi yai we bidi pedalomainu eyu agai dage i wai dao. Tama dage Krai Jisas dali wadolama, tama dage dali te tigidali bulude bidalubo we bidi augwaligo te dago Genuai Bidi Jisas Kraibolo lotu po wabo bage dali, te da tigidali Krai Jisas dali wadoloyu tama Godigo we bidi hani bidibo dao. Aga da, te augwaligo me te dago me Genuai Bidi dao.<sup>a</sup> <sup>3</sup>Eno homugo dago Aya God dali, te Genuai Bidi Jisas Krai dali, augwali sigo te augwa olo tau sabo kolesaga me, te bidi homu dua digi nagame ilibo kolesaga dali si te dagebolo mao.

### Polgo Godiba puba hwi po wali

<sup>4</sup>Eno gedu haluasa po weyu, tama tigidali sogo eno te ena Godibolo dagede puba hwi po wabo dao. Magi baso meni, dage Krai Jisas dali wadolobaso Godigo dage olo tau siduai dao. <sup>5</sup>Dage Krai dali wadoloyu tama Godigo bomo dagebolo mayu, dage te tigidali dwagi yai kolesaga ebode te dage usu mu dao, şa pabeo. Tama tiyu, dagego te Godigo po kuna koneyu tama gasa we bidibolo pusubo şe te dage usu nubo dao. <sup>6</sup>Te Kraisde ola mani po te dagego bugagia mu odolama te sai dao. Tama selama, tama dagego ebo kolesaga hasegelebaso, te gasa we bidi dabe augwaligo sulama tama augwaligo koneai, dagego te Kraisde ola mani po mu odobo dao. Tama tibaso, <sup>7</sup>te Godigo dagebolo maiabo wiegi yai şe yabo bomu tigidali dagego sai dao, tede dage şa peyu habuge me ebeo. Tama dagego tama selama, dagego dago Genuai Bidi Jisas Krai hania pedalabo sogo asobo tonaluyu bidibo dao. <sup>8</sup>Tama agai te dagego agade konealubo po daş weyu agaba homugo tialubo kolesaga, te agai bomu ilama, tama te tigidali nai silabo sogo usu nigi paibao. Agai tama tiyu, tama dago Genuai Bidi Jisas Krai aga ma asobo sogo te sogo dage şeşe meni yai we bidi pedalabao. <sup>9</sup>Te God aga digi dage aga ogwa Jisas Krai dali wadolomainogo eyu tama dage i wali bidi, te tiwai God aga digi da te agai homugo dage dali keş pai bidi mu dao, te dage agaba tiş pabo te usu dao.

### Te Korin dabe augwa hasi bugulama hani si sela pedalai

<sup>10</sup>Ama dedeo, te dago Genuai Bidi Jisas Krai agai aga nogigo bomu enabolo mobaso, eno homu dene ebadi te nogi bomogo eno e po dagebolo

---

<sup>a</sup> 1:1-2 Tpi 18:1

megi obao, dage tigidaligo deli homu naga eyu tama po deli tama wao. Dage si sela pebeda pigimio. Te mu menio. Dage bidibo deli hani tama bidiyu, deli homu kolesaga naga dali, te deli şe yabo homu dali te şe yao. <sup>11</sup>Eno te po dagebolo magi baso obawe? Woo, eno ama dede, te dage tomode bidibo we nogi Kloe, aga bede bidibo bage meba augwaligo enabolo wali, duga hasi tomode wado ebo wali. <sup>12</sup>E tiwai dao: dage tigidali deli deligo gasagi gasagi yai po wabo. Me badugo te po wabo, “Ena Pol wali pabo dao.” Me badugo te po wabo, “Ena Apolos wali pabo dao.” Me badugo “Ena Pita wali pabo dao” wabo. Tama me badugo “Ena Kraisi wali pabo dao,” te po wabo.<sup>b</sup> <sup>13</sup>Tega! Magi yaliwe? Kraisi tomode pebeda pali elaluba agawe? Ena Pol, te ena dage tobade te ni pedaide isaliwe? Te dage baptais yalide, te ena Pol wali pomainogo eyu tama dage baptais yali dawe? Te mu meni.

<sup>14-15</sup>Dage tomode eno baptais yali te Krispus dali Gaius dali te bidi sidigi da. Gasa bidi meni. Tama eno te we bidi hauwa te baptais masiğbaso, ena dwagi yai homu ebo dao. Magi baso meni. Te eno we bidi hauwa te baptais magi sogo da, teda augwaligo te “Da Pol wali peyu tama baptais salio,” te po augwaligo wagi da. <sup>16</sup>E, eno megi tama ma kone palali, te bidi Stefanasi dali aga hani dali digi te me eno baptais mani da. Eno gasa me baptais maniwe ma meniwe, te eno konebeo, kegeda pai. <sup>17</sup>Tama Kraisi ena tagala palali te we bidi baptais emainogo tagala palabeo. Menio. Agai ena tagala palali eno te Godigo wiegi yai gesi po te we bidi augwalibolo pusumainogo tagala palali. Tama tiyu agai homugo eno te tğde koneai bidi dabego wabo pogo agai gesi po page ola menamuo te homu yai. Te Kraisi aga te ni pedaide isibogo bomu eno dolidali weyu tama eno te tğde koneai bidigo po pusubo kolesaga wali pabo meni.

### **Godigo wiegi yai homu kolesaga dali agai genuai bomu dali si po**

<sup>18</sup>Eno koneani, te augwali digi dolobo şe ebo tğdu pabo we bidi augwaligo homu te Kraisi ni pedaide isali po te homu kolesaga meni yai bidigo wabo po naga dao. Tiali goli te da Godigo ma dobola sabo we bidi, te dago homu te po da te Godigo genuai bomu hania ola mabo po dao. <sup>19</sup>Tama tede te Godigo po aşani bukude Godigo wali po me deli e tiwai elalubao:

“Te eno te tğde koneani bidi dabego homu  
kolesaga dolaibao, te haniani şede polo konea pabo  
bidi dabego homu kolesaga ena sela şawaibao,”<sup>c</sup>

Godigo te po wai. <sup>20</sup>Tama Godigo te po polobadu obaso, te tğde koneai bidi dabe augwali magi yaibawe? Te buku hauwa elalubo po page konebo

<sup>b</sup> 1:12 Tpi 18:24    <sup>c</sup> 1:19 Ais 29:14

bage, augwali me magi yaibawe? Ma, te gasa bidigo homu bega sabo po bugagia wabo bage, augwali me mena şe me elalubawe? Menio. Godigo dabolo hanilama hania ola mawai dao, te e tõe elalubo wiegi yai homu kolesaga te olo nai tiwai dao, te homu kolesaga meni yai bidigo olo po naga dao.<sup>d</sup>

<sup>21</sup> Magi baso meni, God aga homu kolesaga te wiegi yai mu, aga tigidali naide kuna konebo kolesaga sia pai elalubo dao. Tama agai te tiwai ilama tama we bidi augwaligo augwa homu kolesagago naga aga konesişbo şe ilali. Tialima Godigo homugo te dago Kraisde pusubo pogo agai te po augwa homugo konealubo we bidi agai ma dobola saibao. Tõe we bidi augwaligo te pode te homu kolesaga meni yai bidigo olo po naga dao homu yali, tiali goli Godigo homugo te pogo agai we bidi ma saibao. <sup>22-23</sup> Te Juda bage augwaligo te po wabo dao, “Te ola mabo pode, te dago gedugo te nago te bidigo isşbo genuai bomai şe ebo subaso da, teda dago te nago ola mabo po te mu po dao homu yaibao.” Tiali goli eno “Te Krais aga te ni pedaide isali kolesaga te genuai şe dao,” te po eno te Juda dabebolo obaso, augwaligo te po hagela eyu oda tagalobo dao. Me ma, te Juda hani isşwai bage augwaligo homugo bidi mego aga digi homu kolesagago naga augwalibolo augwa e tõe bidibo kolesaga page hania ola mao, te homu augwaligo ebo dao. Tama tiali goli dago te Krais ni pedaide isali po augwalibolo ola mobaso, hagela homu eyu te pode augwaligo me te homu kolesaga meni yai olo po naga dao, te homu ebo dao. <sup>24</sup> Tiali goli te da Godigo i olama diş sali we bidi, da me badu Juda bage, me badu te Juda hani isşwai bage, dago homu te Kraisde pusubo pogo te Godigo genuai bomo dali aga wiegi yai homu kolesaga me te hania ola mabo dao. <sup>25</sup> Magi baso meni, bidigo gedude te Godigo yali homu kolesaga te page meni yai homu kolesaga dao. Tiali goli agai homu kolesaga wiegi yai mu dao, tego te tõe bidigo homu kolesaga tigidali aiyaba elalubo dao. Tama bidigo gedude Godigo yali şe, te bomo meni yai şe dao. Tiali goli te mu meni, agai genuai bomogo te tõe we bidigo bomo tigidali aiyaba elalubo dao.

<sup>26</sup> Eno ama dede, kone palao. Te Godigo dage i wali sogo te dage magi we bidi dabe bidaliwe? Te tõe bidigo gedude dage tomode te haniani naide bugagia koneani bidi hauwa meni, te gasa we bidi tonalubo bomo elalubo bidi hauwa meni, te genuai nogi yai bidi dage tomode hauwa menio. <sup>27</sup> Te meni. God agai homugo eyu tama te tõe haniani naide kuna koneani we bidi hale emainogo eyu, agai te augwaligo gedude te homu kolesaga meni yai bage diş sali. Tama me te tõe genuai bomo elalubo bage hale emainogo eyu, agai te tõe we bidigo gedude bomo meni yai we bidi diş sali. <sup>28</sup> Te tõe we bidi augwaligo gasa we bidi me badude

---

<sup>d</sup> 1:20 Jop 12:17; Ais 19:12; 33:18; 44:25

e homu ebo dao, “Woo, augwali te nogi meni yai bage naga dao, dwai bage dao, augwali olo nai naga dao,” te homu ebo dao. Tiali goli agai te tõe we bidigo gedude genuai wiegi yai nai dolomainogo eyu, Godigo te tobage olo we bidi dią sai dao. <sup>29</sup>Tama tibaso, dago hania koneani, te bidi me deligo aga digi nogi Godigo gedude ugwaba me sogobeo. <sup>30</sup>Tiali goli Godigo dage Krajs Jisas dali wadolali, te agai tilama tama Krajsgo da wiegi yai homu kolesaga elalubo we bidi nigali. Te Krajsde God agai da agai wiegi yai we bidi hani mu ilali, tama dago dwai seđe sali seđe sela şanama tama da olo bugagia bidibao. <sup>31</sup>Tama tibaso, te dago te Godigo po bukude elalubo po me deli tiwai inao. Tede e tiwai po wai dao, “Bidi me deligo te nogi ugwaba sabo po wabo homu eyu da, teda agai dago Genuai Bidigo nogi naga ugwaba sao,” te po aşani.<sup>e</sup>

**Polgo te Korin dabego konealubo po daų  
omainu te ni pedaide po page pusali**

**2** <sup>1</sup>Tama eno ama dedeo, polobadu hasia ena dageba asama, tama eno Godigo geme dualali mu po te dagebolo pusagasali, tiali goli eno te haniani pogo te dage homu begelemainogo me wabeo. Tama eno te koneani genuai genuai kolesagade te po dagebolo me pusubeo. <sup>2</sup>Te eno homugo digi eno tiwai po walio: te ena dage tomode bidibo sogo, te eno homugo gasa nai me konebo se me ebeo. Menio. Eno homugo te Jisas Krajsba naga konealumainogo yaibao. Awe, te Jisas Krajs ni pedaide isai dao, tede naga eno dagebolo po pusabo homu yai. <sup>3</sup>Tama polobadu ena dage dali bidali sogo, te sogo ena bomo meni yani. Ena moni wi elalu, tama ena tigi didibili hauwa yai. <sup>4</sup>Tama eno ola mani po me, te dagebolo pusali po me, te eno te kolesaga koneai bidigo kolesaga selama, te dagego homu bega sabo po me wabe. Menio. Dagego te Tedali Mobo Bidigo bomu kuna konemainogo eyu, eno Godigo po dagebolo ola mayu wai dao. <sup>5</sup>Eno tama tiali. Magi baso meni, eno homugo te bidigo homu kolesagaba te dagego homu teba tialugobeo. Menio. Eno homugo te dagego Godigo bomode naga te Krajsde konealubo po daų weyu, tama teba naga duga homu bugagia tialuaibao. Tama tibaso, eno te Krajsgo po dagebolo pusuyu, eno te kolesaga koneai bidigo po wabo kolesaga wali pabeo, eno te tobage homu bega sabo pogo te Krajsgo po dagebolo pusubeo.

**Godigo Tedali Mobogo te kuna koneabo kolesaga dabolo mani**

<sup>6</sup>Te tõe kolesaga koneai bidi dabego kolesaga eno dagebolo ola masiawanı goli, te Godigo Mobo Bidigo te Godide ola mabo po page kuna konebo usu yali we bidi augwalibolo eno te koneani kolesaga po pusubo dao. Tiali goli te tõe bidi dabego koneani kolesaga po me wabo

<sup>e</sup> 1:31 Jer 9:24

meni. Tama te tçde tobolu bidi dabego kolesaga me dago wabo meni, te augwaligo bomo kimi megi meni ebo. <sup>7</sup>Tiali goli dago te Godigo koneani kolesaga po pusubo dao. Te po te bidi dabego koneidali weyu geme dualaluali. Godigo te tç dagalu nigisişbadi tama agai te koneani kolesaga sa muani te dabolo mayu, tama te koneani kolesagago dago te Godigo bomai ula digi nosali selama tama bugagia bidimainu yalio. Tama te tobage koneani kolesaga po dago te we bidibolo ola mabo da. <sup>8</sup>Te e tçde tobolu bidi deli mego te koneani kolesaga po page me konebeo. Menio. Te augwaligo konegi sogo da, teda augwaligo te ula yai bomu elalubo Genuai Bidi me sisinama, tama aga te ni pedaide elama me isigi meni dao. <sup>9</sup>Tiali goli dago te şç dabe po wabo te Godigo po bukude wali po gilama yali,

“Te we bidigo gedugo susişwani nai, tama odogo me odobe, tama bidigo homuba me pedalisişwai, te nai digi Godigo sisi ilali te we bidi dabe augwaligo aga godolo mu ebo bage augwalibolo momainogo yai.”<sup>f</sup>

<sup>10</sup>Tiali goli te polobadu geme dualaluali po te Tedali Mobo Bidigo şçde te Godigo dabolo ola mani. Tedali Mobo Bidigo te tigidali nai osola suyu tama koneani. Tama te Godigo homu kolesagade aga geme dualali nosali şç yabo homu, te me te Mobo Bidigo konebo dao. <sup>11</sup>Mena bidigo te gasa bidi mego homu konegowe? Menio. Te bidi aga mobogo digi, te aga tomode bidibo, tego naga koneani. Te tiwai naga, te gasa bidi me deligo te Godigo homu kolesaga me koneşişwai. Te Godigo Mobogo digi agai naga konebo dao. <sup>12</sup>Tama dago e tçde we bidi tonalubo mobo me sabeo. Menio. Dago te Godidu asali Mobo Bidi sali, tama dago te Godigo dabolo olo maiabo tigidali nai konemainogo yalio.

<sup>13</sup>Tama tibaso, dago te Godigo Tedali Mobo Bidi elalubo we bidibolo te Godigo olo maiabo naide po hanilama pusubadi, dago te bidigo homude selama dago te po me wabo meni. Menio. Te Tedali Mobogo digi da ola menama, tama dago te po ola mabo dao. <sup>14</sup>Tiali goli te Tedali Mobo Bidi elalusişbo bidi da, agai te Godigo Mobogo olo mabo nai dabe sogobeo, aga usu egobeo. Magi baso meni, agai homugo te page meni yai nai dao, tama agai te naide te page bugagia konegobeo. Te naide po dago te Tedali Mobo Bidide naga sali, tama te Tedali Mobo Bidi meni yani bidi da, agai te po page me dagalogobeo. <sup>15</sup>Tialima, te Tedali Mobo elalubo bidigo, agai te tigidali nai dagalama, tama te nai page konebo usu ebo dao. Tiali goli te bidi me deligo te Tedali Mobo elalubo bidi dagalainogo ebo te usu me egobeo. <sup>16</sup>Awe, te Godigo po bukude po me elalubo e tiwai wabo,

“Dego te Genuai Bidigo homu konebaso, te agai

Genuai Bidi mobo mabo usu egowe? Bidi meni,” te aşani po tama wabo. Tiali goli te Kraisgo homu kolesaga dago elalubo dao.<sup>8</sup>

### Godigo po pusubo bidi da te Godigo şe ebo bidi dao

**3** <sup>1</sup>Tama tialima, ama dedeo, polobadu eno digi dagebolo mani po te eno dagebolo te Tedali Mobo Bidi elalubo bidi dabebolo mani po tiwai gilama me mabeo. Usubeo. Menio. Eno dagebolo mani po te eno te poloba homu elalubo bidi dabebolo mabo po tiwai mani. Te sogo dage te Kraisgo kolesagade kuna konesiayu tama te wai bõu tiwai bidibadi tiwai dao. <sup>2</sup>Eno po digi po begelama obao. Dage te Krais wali pabo kolesagade wai bõu tiwai bidibaso, te eno po dagebolo ola mobadi, eno te yadala pai po naga dage ola mani, te wai bõu ame pe mabo tiwai. Eno te dili yai nai dage mabeo. Te sogo dagego te dila pai nai tuabo aq isawai, dagego Godigo şeşeyai po sabo usube. Megi me dage usu yabo me elalubao.<sup>h</sup> <sup>3</sup>Magi baso meni, dage te poloba meda yai homu kolesagade me bididubao. Awe, te ama hasi dali dwai homu eyu tama konila po wabo homu kolesaga te dagede me elalubao. Tama te kolesaga dagego me idubo, te poloba dobo homu kolesaga ebao. Te tama tebo kolesaga te tõe bidigo ebo kolesaga naga dao. <sup>4</sup>Dage tomode bidi me badu deli deligo te po wabo, “Ena Pol wali pabo dao.” Tama gasa bidi me badu deli deligo te po wabo, “Ena da te Apolos wali pabo bidi dao,” te po wabo. Te tiwai kolesaga ebaso, dago koneani, te dage tõe bidi tiwai me bidibao.

<sup>5</sup>Dagego bugagia homu kone palao. Apolos wali te de dawey? Ena Pol, ena de dawey? Da si da te şe bidi naga bidibao. Genuai Bidigo gasa gasa şe da sibolo mawai, tama da sigo te yali şede dagego konealubo po te Kraisde daş wali. <sup>6</sup>Eno da te nai wai bulali. Te Apolosgo te nai wai bulali madi pageba weş gegeli pali. Tiali goli God agai te nai pua pai holomainu iliduali. <sup>7</sup>Tama te nai wai bulali bidi, agai nogi te meni yaibao. Tama te weş mabo bidi, agai nogi me te elalugobeo. Magigo menio. Godigo te nai holomainu ilidubao, agaduba deligo genuai nogi naga elalubo dao. <sup>8</sup>Tama te nai wai bulubo bidi me, te nai waiba weş mabo bidi, te augwali sigo şe te deli tigi poai naga yali. Tama augwali si deli deligo te augwa si yali şe usu nama, te Godigo augwalibolo mabo dwagi yai nai saibao. <sup>9</sup>Magi baso meni, da si te Godigo deli şeş naga ebo şeş bidi dao, tama dage te Godigo gi tiwai dao.

### Te Godigo we bidibolo po pusubo şeş bidi te kamda şeş ebo bidi tiwai

Tama dage te Godigo be tiwai, aga te be şedu bidibao. <sup>10</sup>Te God aga olo da tau sali wiegi yai kolesagade ena te Godigo po pusubo şede te

<sup>8</sup> 2:16 Ais 40:13    <sup>h</sup> 3:2 Hib 5:12-13

polalubo tobolu bidi te kolesaga koneai kamda bidi tiwai pedalali, tama eno te be pos ni bulalio. Tama gasa bidigo te pos ni daide ugwadu te be se ebao. Tama tigidali bidi augwali deli deli dua bugagia koneama tama te pos ni daide be se yao. <sup>11</sup>Dagego koneani, te be pos ni mu bulai elalubao, te Jisas Krais naga dao. Tama niwai bidi me deligo agai te gasa pos ni me bulainu ebo te usu me egobeo. <sup>12</sup>Tama te pos ni daide ugwadu be se yainu ebo bidi augwali deli deligo haniani naigo te be se yaibao. Bidi me deligo te wiegi yai kapa nogi gol tego te be se yaibao. Bidi mego te kapa nogi silvago ma te dila pai masigi mugo, me te nigo, ma te kalago, ma te gasagi yai nosai dili dabego te be se yaibao. <sup>13</sup>Te magi naigo te be se yainu homu ebaso da, teda te tigidali bidigo se yali te nosali po tu ebo sogo te hania haninama pedalaibao. Tama te po tu ebo side te sia dabo posolo ebo tiwai pedalaibao. Tama te sia aga digi te tigidali bidi deli deligo yali se usu sesa pelama, tama augwaligo yali se te wiegi yai yaliwe ma meniwe, te augwaligo koneaibao. <sup>14</sup>Te bidi deligo be te pos ni daide se ebaso, tama agai te be siago disiqbaso da, teda te se bidibolo Godigo dwagi yai nai mawaibao. <sup>15</sup>Tiali goli te se bidi me deligo be te tigidali siago dobaso da, teda te bidigo yali tigidali se te hagawaibao. Tialima te se bidi aga digi te bugagia bidaibao, tiali goli te bidi siago dabo be buluba wi paligo te sana pali bidi tiwai bidaibao.

### Dage te Godigo wiegi yai be dao

<sup>16</sup>Dage da te Godigo wiegi yai lotu be tiwai dao, tama te Godigo Tedali Mobo Bidi te dage tomode bidibao, bidi aga bede bidibo tiwai bidibao. Tama te dagego me konebewe? <sup>17</sup>Te bidi deligo Godigo te wiegi yai lotu be elalubo te dolobaso da, teda Godigo te bidi dolaibao. Magi baso meni, te Godigo be te tedali gasagi yai mu elalubo, te Godigo be naga dao. Te dage tama dao.

<sup>18</sup>Tiyu te bidi me deli agade digi tibo po ola mayabuo. Te dage tomode bidi deli agai te e tode homu kolesaga wali peyu tama te tiwai homu eyu, ‘Eno kolesaga koneai elalubo,’ aga te homu eyu da, teda aga hasia bolo aga te tode we bidigo gedude te wabo pabo bidi tiwai pedala. Tama tiyu aga te Godigo gedude te kolesaga koneai bidi mu pedalaibao. <sup>19</sup>Magi baso meni, te e tode koneani kolesaga te Godigo gedude te wabo pabo bidigo kolesaga tiwai ebao. Tede te Godigo po bukude te e tama tiwai po wai:

“God agai tilama tama augwaligo kolesaga koneanigo te augwa digi tibo haniani kolesaga koneai bidi dabe sali, te bidigo ba munama te kebi sabo tiwai gilama ebo dao.”<sup>i</sup>

<sup>20</sup>Tama tede te bukude te tiwai po me wali:

<sup>i</sup> 3:19 Jop 5:13



“Genuai Bidigo koneani, te kolesaga koneai bidi dabego homu kolesaga te du walisiąbo olo nai tiwai ebo dao.”<sup>j</sup>

<sup>21</sup>Tama tibaso, te dage tomode te bidi me deligo te da Godigo po pusubo bidigo nogi ugwaba sabuo. Suao, te tigidali nai duga nai dao. <sup>22</sup>Ena Pol, me Apolos, me Pita, da te dage tau sabo şe ebo bidi dabe da. E tųde elalubo nai tigidali me, tego dage aiyaba elaluama tonaluabo nai meni, dagego te nai tigidali aiyaba elaluama tonaluabo bage dao. Te tųde bidibo sogo me, te isibo kolesaga me, te megi elalubo sogo me, te nosali pedalabo sogo me, te tigidali te dagego nai dao. <sup>23</sup>Tama dage te Kraiss dologode bidiyu dage agai we bidi hani dao. Tama Kraiss aga digi God dologode bidiyu aga Godigo bidi dao.

### Genuai Bidigo digi aga şe bidi dagalaibao

**4** <sup>1</sup>Dagego te ena Pol dali, Apolos dali, Pita dali te dade dagego homugo kone paluyu tama koneao, da te Kraisso şe ebo bidi dabe tama Godigo te geme dualalubo po pusuyu tonalubo bidi dabe dao. <sup>2</sup>Tama te şe tonalubo şede te tiwai bomai po elalubao: te şe ebo bidigo te şe idubadi aga te agabolo te şe mani bidi dali homugo keą pai bidi bidao. <sup>3</sup>Tiali goli te dage, ma te bidi me deligo po tųgo te eno te şe ebo kolesaga dagalainogo da, teda eno homugo te magigo meni. Magi baso meni. Ena digi me te ena şe ebo kolesaga te me dagalabo menio. Tiali goli te usu dao, po meni. <sup>4</sup>Mu tama, te Godigo enabolo mani şe ebode eno homugo eno te şede sųą pabeo, bugagia yai dao. Tiali goli te eno tama tiwai po wabo usu me egobe: “Ena doloba pai bidi da,” te wagobeo. Te ena dagalobo şe ebo bidi te Genuai Bidigo şe naga dao. <sup>5</sup>Tama tibaso, te sogo me elalubadi, te dago Genuai Bidi asisąbadi dagego te gasa bidi mego ebo kolesaga dagaligio. Aga asama tama agai te we bidi augwaligo augwa homu tomode geme dualaluali po tigidali selama te ulaba muagasaibao. Tama tigidali bidigo homu kolesaga hania hanilaibao. Tama te sogo Godigo da tigidali deli deli bidi te dago yali şe osola sulama, tama te şe usu baso agai te şe yali bidigo nogi ugwaba saibao. Bidi deli deligo yali şe usu nama te aga nogi te tama naga ugwaba saibao.

<sup>6</sup>Ama dedeo, eno homugo dage tau sabo homu elama, tama eno te ena dali Apolos da side te tamadi tama wali po wali. Dagego homugo da side homu koneama, tama te Godigo po bukude wali po tiwai gilama dolo wali peyu tama te po me boligio. Tama tiyu dagego hagoma eyu tama bidi me deligo nogi ugwaba siyu tama gasa bidi mego nogi aiyaba munu me elalugio. <sup>7</sup>Abagi, magi yaliwe? Dego nage genuai bidi muai dawe? Tama nago mena nai te Godide sisąwani nai elalubowe? Te mu tama nago te nai

Godide saligo da, teda magi baso te nago naga nogi ugwaba siyu, te naga digi nage te nai page bidi da wainogo ebawe? Te hagoma ebo tagalao.

<sup>8</sup>Awe, dagego homugo te dagego haliga pağana palio! Dagego homugo te dage tigidali nai elalu tama dage usu yai elalubao. Te dagego da aiyaba elaluama, tama dage te gavman tuni bidi king tiwai pedalalio! Mu tama dawe? Woo, te duga homu naga dao. Eno homugo dage te tuni bidi king mu pedalomainao. Dage tama tigi sogo da, teda da me dage dali te tuni bidi dabego bomu elalugi da. <sup>9</sup>Magi baso meni, eno te homu yali: Godigo te da aga po sela pabo şe bidi da te nosali badu mubo bidi tiwai ilama bidibao. Da te po tų yali bidi dabe da olama tama da isimainu emainao wai. Tama augwaligo da tigidali te ensel dabe me te tųde bidi dabe dali augwaligo gedude da elainu homu yali, te tigidaligo da dali gisugu mawainogo yali. <sup>10</sup>Te Kraisgo nogi ugwaba sainu, da te tųde we bidigo gedude te kolesaga geda muyu te polobo bidi tiwai bidibo dao, tiali goli dage te Kraisgo kolesagade te kolesaga koneai bidi tiwai bidibao. Dage bomai we bidi mu bidimainogo eyu tama dago dena digi bomu meni yai bidi dabe ilali. Dage genuai wiegi yai nogi elalubao, tiali goli dago nogi meni yanio. <sup>11</sup>Polobadu me tama bidada asali te megi e sogoba me usu nagasali, da Godigo po sela pabo bidi dabe, da nai sili bidiyu, tama dago dogoni me wa peyu ađ nogone ebo, tama da badi ugwa naga elaluali. Augwaligo nogo tudi badu da eliyu ebo dao. Tama da bugagia dulalu bidabo pesage meni yai dao. <sup>12</sup>Dago dena nogogo digi masigi dena tigi tau sabo şe eyu dene mu ebo dao. Augwaligo dwai posobo po dabolo wabo, tiali goli dago augwali bugagia bidabo po naga augwaliba ponoyu ebo dao. Augwaligo dabolo dwai şe eyu, te dene mabo kolesaga ebo, tama augwaligo te tiwai şe eyu dago sula tagalama, te şeğe bugagia tolobo dao.<sup>k</sup> <sup>13</sup>Augwaligo po dwai mu da dali weyu ebo dao, tiali goli dago homu nagame ilibo po dua digi augwaliba weyu ebo dao. Da te tigidali tų pedaide bidibo bagego gedude te dwai pobebe bage tiwai mu gagawali. Da te tigidali bidigo gedude te nai ulubo genagide nai kagali te ađgo sela şabo meda yai nai tiwai dao. Da te tiwai bidali, te megi e sogoba usu nagasu te tiwai me bidibao.

#### **Te Korin we bidi augwaligo me te Polgo ebo kolesaga yao po wai**

<sup>14</sup>Te ena dali Apolos da si hobedagia bidibadi dage bugagia te po aşanigo te dage hale eyu dwai bidimainu homu me ebeo. Menio. Eno wai puluba tiwai dage eno dwagi yai homu eyu godolo ebaso, tama eno dage homu tau sabo po ola momainu obao. <sup>15</sup>Te mu tama dage te Kraisgo kolesagade te dage bugagia tonalubo bidi te bidi sese umabo te 10,000 bidi elaluyu da, tagalao, te dagego aya hauwa me elalubeo. Menio. Te

<sup>k</sup> 4:12 Tpi 18:3

da Krajs Jisas dali wadolobo kolesagade enaduba deli ena te dagego aya tiwai bidibao. Dage eno te Krajsde wiegi yai gesi po pusama, tama dagego te po odolama tama Krajs wali pabo gagalali. Tede te dage eno wai puluba pedalali. <sup>16</sup>Tama tibaso, eno dage te eno kolesagade usu selama bilimainu tama dage eno hodolobo te usu dao, ena da dagego aya tiwai dao. <sup>17</sup>Tama tibaso, te kolesagade naga eno te bidi Timoti dageba tagala palali. Aga te eno ogwa tiwai da, tama eno aga godolo mu eyu aga ena dali te homugo keş pai bidi dao. Te agai dagego homu ma hodoliyu, te eno Krajsgo kolesagade wali pabo sunumi wali pomainu homu hodolaibao. Eno te tigidali bulude te Godigo po wali pabo we bidi hani tigidaliba te kolesaga naga ola mabo dao.

<sup>18</sup>Te dage tomode bidi meba augwaligo homugo te ena dageba asogobe homu eyu, tama augwali hagoma ebao. <sup>19</sup>Tiali goli menio. Te Genuai Bidigo homu usu yali da, teda ena dage bidiboba polo asaibao. Tama eno te hagoma ebo bidi dabego wabo po naga konegobeo, te augwaligo te Godigo şe yabo bomu me elalubowe ma meniwe, te me eno koneaibao. <sup>20</sup>Magi baso meni, te Godigo bidi deli tonalubo si, te bidigo ebo şede naga dago God aga dali bidibo te konebo dao. Aga wabo pogo naga dago konegobeo. <sup>21</sup>Dagego mena kolesaga godolo ebowe? Te dagego homugo eno te dage dodolabo dono wabi tolasa ena dageba asomainogowe? Ma, dagego homugo eno te dage dali dwagi yai homu eyu godolo ebo kolesaga me, te homu nagame ebo kolesaga elalubo te eno dageba sela asomainogo homu ebo dawe?

## **Te Godigo po wali pabo bagego te augwali tomode pedalubo dwai kolesaga dodolao po wali**

*(Daj 5-6)*

### **Te dwai penani şe te Korin bage tomode pedalali**

**5** <sup>1</sup>Te we sabo kolesaga togolama dolobo şe te dage tomode mu tama elalubao, te po wabo eno me odali. Tama te we sabo togolama dolobo gasagi yai kolesaga me, te tobage kolesaga te Godigo po odisawani we bidigo me isabo dwai kolesaga dao. Te e tama tiwai: te dage tomode bidi me deligo aga ayago we sai.<sup>1</sup> <sup>2</sup>Tama dage, dage me tama duga nogi ugwaba siyu hagoma idubawe? Te dagego tede hagoma ebo kolesaga tagalama, te dage homu dene eyu gela wagi sogo da, teda te usu igi mu da. Tama tiyu, te dagego te dwai penani kolesaga ebo bidi sela şanama, tama dage dali me bidimainu me elamu dao! <sup>3</sup>Te enade, mu tama, te eno tigi te dagede digibulu elalubo, tiali goli te eno homude

<sup>1</sup> 5:1 Bom 22:30

ena te dage dali bidibao. Tama ena da te ena dage dali mu bidibo tiwai aq ebo, tama eno te kolesaga ebo bidigo se te eno me dagala suai dao. <sup>4</sup>Eno te tiwai po wai dao: te Genuai Bidi Jisasio nogide te dage deliba sisanama po miao. Tama eno homu me, te dago Genuai Bidi Jisasio bomo me te dage dali bidaibao. <sup>5</sup>Tama tiyu te bidi dagego te Satango nogoba munama, te agai te dwai se yali bidigo tigi dolomainao. Dago te tiwai elama, tama aga tigi dolai goli Godigo te bidigo mobo noma bidi te Genuai Bidi ma asobo side ma dobola somaino tama tiao.

**Te Korin bidi dabe augwaligo te dwai se ebo bidi sela şamainu wai**

<sup>6</sup>Te dage tomode te bidi me deligo te dwai penani se idubao, tama dagego tede hagoma ebo kolesaga ebao, te dwali. Te aga dage dali me bididubadi, te aga te tubo nai bret bo dabo nai yis tiwai dao. Te dwasianu yisgo te tigidali bret bo domainu ilibo dao. Te dagego konesişu ebawe? <sup>7</sup>Dage da te yis meni yai bret tiwai dao. Awe, te eno koneani. Tiali goli te dwai penani se ebo bidi dage tomode bididubadi aga te yis tiwai eyu, tama agai dwai se ebo kolesagago dage me dolaibao. Te Juda dabego Pasova nai tubo olo bidibo side, tede augwaligo te sipsip wai ela tuyu, tama te sogo me te bo disawai bret me tuai dao. Te tiwai me megi te dago Pasova sipsip Kraisa aga isama te ofa mayu yai dao. Tama tibaso, dagego te bidi buluba şayao, te dage te gesi bret, te yis meni yai bret tiwai ma pedalomaino yao.<sup>m</sup> <sup>8</sup>Tama tilama, da dwagi yai homu eyu deliba sisanama tama dago Pasova nai tuinao. Tede eno po digi po begelama tama po page obao, dago tama tuyu dago te poloba yis dali tulamuo, te yis meni yai bret naga tuao. Te po page e dao: dago te dwai se yabo homu dali te dwai dwai se ebo kolesaga dali te si ilamuo. Meni. Dago homu mu naga eyu, tama mu po naga weyu yao.<sup>n</sup>

<sup>9</sup>Te eno gasa me dagebolo aşana tolali pasde eno e tama po wai: “Dagego te dwai penani se eyu we sabo kolesaga dolobo bidi dabe dali kisasa biligimio,” te po aşana tolali. <sup>10</sup>Eno te we sabo kolesaga doloyu ebo te Godigo po odisawani tigidali bidi dabe augwali te mu tagalao po weyu eno te po wabe. Te tede bidi dabe augwaligo Godigo po wali pişu tama te mena nai pesa ebo bidi dabe me te gasa bidigo nai anoma elama sainu ebo bidi me, te tibo godiba lotu po wabo bidi dabe, te augwali mu tagalao olama eno te po me wabeo. Te dagego te dabe mu tagalabo homu egi sogo da, teda dagego te tigidali tş mu taga pelama, tama gasaba bidigi pigi da. <sup>11</sup>Tiali goli eno aşani po page te e tiwai dao: te bidi me deligo aga dage dali ama da wabo bidigo te we sabo kolesaga dolobo me, agai te gasa bidigo naide pesa eyu, me agai tibo godibolo lotu po weyu, me agai posobo po obaso me, ma agai bomai we tubaso, ma agai te gasa

bidigo nai anoma elama te tigidali kolesaga ebaso da, teda dagego aga dali kisasa biligio, aga dali abagi me wagio. Menio. Dagego te tiwai şe ebo bidi dali te nai me munu me tulamo dao. <sup>12-13</sup>Te Godigo po odisawani dago hani bulu badu bidibo we bidi dabe dagalobo şe, te eno şe dawe? Menio. Te God aga digi augwaligo kolesaga dagalaibao. Tiali goli te dage dali bidiyu Godigo po wali pabo we bidi hani tomode elalubo bage, te augwali dagalobo şe, te dagego yabo şe dao. Tede te Godigo po bukude po me deli elalubao, te po dago wali pinao, te po e dao: "Dagego te dage tomode bidibo te dwai bidi buluba mu sela şayao."<sup>o</sup>

**Te Godigo po wali pabo we bidigo te augwa ama po tų ela magio wali**

**6** <sup>1</sup>Te dage tomode bidi me deligo po te gasa bidi me dali elalubaso da, te agai te Godigo we bidi bolama tama te Godigo po odisawani jas bidi dabe gesabidide te po tų egi pogowe? Ya! Agai te tebo kolesagade te aga hale meni yaibawe? <sup>2</sup>Da Godigo we bidi te dago te tigidali tųde bidigo kolesaga nosali dagalainu yaibao, te dagego konesawawe? Mu tama, te dagego te tigidali tųde bidigo kolesaga dagalaibao. Tama magi egowe? Te dagego duga hasi te tobage dwasianu po naga dagalobo te usu meniwe? <sup>3</sup>Te dago te mobo bidi ensel dabego kolesaga me nosali dagalaibao, te me dagego konebewe? Mu tama, te dago augwaligo kolesaga te dagalaibao. Tama tibaso, dago te tųde dwasianu nai dabe po dagalobaso te usu mu yaibao. <sup>4</sup>Tama tialigo da, teda dagego e tųde naide po elalubaso da, magi baso dagego te po dagalobo şe te Godigo po odisawani te dago gedude nogi meni yani bidiba mobawe? <sup>5</sup>Eno te po wabode dage bugagia bidimainu obao, te dagego te tiwai ebo kolesagade te dage hale yao! Magi baso meni. Te dage tomode te ama name si tomode pedalobo po dagalabo te kolesaga koneai bidi me deli naga meni ebawe? <sup>6</sup>Tiali goli dagego te tiwai ebo meni. Te po pagede naga te ama me deligo te gasa ama me te po tų ela mayu, tama te Kraisde konealubo po daų wasiawani bidi dabe gedude te po tų ilibo da. Te dwali.

<sup>7</sup>Awe, dagego duga hasi te ama dabe po tų ilibo, tama te kolesagade digi te dage tulalualio. Magi baso augwaligo te dwai şe dagebolo emainu gogolobewe? Magi baso te augwaligo dagego doado bage anoma elama somainogo gogolobewe? Dagego te tiwai egi sogo da, teda tebogo dagego te Godigo po odisawani bidigo gedude po tų ebo kolesaga aiyaba elalugi da. <sup>8</sup>Tiali goli menio. Duga digi te meba bidi dabe dali dwai şe elama, tama augwaligo doado bage anoma elama sali! Awe, dagego te tiwai dwai kolesaga te duga ama dabe mu dali ebo dao. <sup>9</sup>Te dwai kolesaga ebo bidi dabe, augwali te augwali Godigo te we bidi tonalubo bomo tomoba me pogobeo. Te dagego konebewe? Tiyu dagego te duga homuba digi tibo

po ola maiabuo. Te penani şe kolesaga ebo bidi dabe me, tama te tibo god wali pabo bidi dabe me, te we sabo kolesaga dolobo bidi dabe badi, tama te we dali ebo kolesaga tiwai eyu godolo ebo bidi dabe me, tama te hale ebo kolesaga te gasa bidi dabe dali ebo bidi dabe me, <sup>10</sup>tama te nai wi sabo bidi dabe tama te gasa bidi dabego doado bagede pesa homu ebo bidi dabe me, tama te bomai we tubo bidi me, tama te gasa bidi dali posobo po wabo bidi dabe me, tama te gasa bidi dabego doado bage anoma elama sabo bidi dabe me, te tobage kolesaga ebo bidi dabe tigidali te augwali Godigo we bidi bugagia tonalubo bomo tomoba pabo usu me egobeo. <sup>11</sup>Tama polobadu dage meba te tiwai şe ebo we bidi dabe bidaluali. Tiali goli dagego te dwai şe ebo tagalama, tama baptais salio. Godigo dage aga da olama sa muai. Dagego te doloba pai nogi salio. Te Genuai Bidi Jisas Kraiss me te Godigo Tedali Mobo augwali sigo şe eyu, tama dage Godigo gedude doloba pai we bidi hani tama pedalai dao.

#### **Te dago tigo ebo kolesaga ebogo te God nogi ugwaba sao**

<sup>12</sup>Dage tomode te bidi me deligo e tiwai homu ebo dao, ‘Te tigidali şe eno ebo da te usu egi da.’ Awe, mu tama. Tiali goli te tigidali şe ebogo ena tau me sogobe. Tigidali kolesaga eno yabo usu da yaibao. Tiali goli eno te kolesaga me deli ebogo te ena tonalumainu me gogologobeo. <sup>13</sup>Gasa bidigo eno po aiyaba elalumainu eyu e tiwai po waibao, “Tubo nai te tabigo sabo nai da, tama tabigo te nai sabo dao.” Agai homu te tiwai me aga tigo te dwai penani şe ebo te me usu dao, te aga tigo yabo şe dao. Awe, agai te tubo nai dali te tabi dali side wali po te mu dao. Tiali goli Godigo te si dali nosali silaibao. Tiali goli dago tigo te penani kolesaga yabo nai meni. Menio. Dago tigi da te dago Genuai Bidigo nai dao. Tama Genuai Bidi te tigi tau sabo nai dabolo mabo dao. <sup>14</sup>Tama tiyu, God aga bomogo digi te dago Genuai Bidi te gu pagede hodolali, tama te tiwai dago tigi tau siyu agai da me hodolaibao.

<sup>15</sup>Te dage deli deligo tigi te Kraisso tigi nogo saşu tiwai elalubo, te dagego me konebewe? Tama eno te Kraisso tigi pedai me badu dagala selama, tama penani eyu, te genuai tuđu bilibo wego tigiba munama elalumainu homu egowe? Munu me tegobeo. Mu menio! <sup>16</sup>Te penani şe ebo we dali kisa sali bidi, te aga dali te tigi deli aga dali yali, te dagego konebewe? Godigo po bukude te tiwai po olama hania wali, “Te bidi dali aga we dali augwali si tigi deli naga pedalali,” te po aşani.<sup>p</sup> <sup>17</sup>Tiali goli te Genuai Bidi dali keşu sali bidi da, agai homu mobo bidi te aga dali deli elalubo dao.

<sup>18</sup>Dage te penani kolesaga idali weyu te boi bidi tiwai wi pao! Te tigidali dwai şe te bidigo ebo, te tigi bulu badu ebo dao. Tiali goli te

penani şe kolesaga ebo bidi, agai aga tigi aga digi dolobo dao. <sup>19</sup>Te dagego tigi da, te homude Godigo Tedali Wiegi Yai Mobogo be elalubao, te dagego konebewe? Godigo te Tedali Wiegi Yai Mobo te dagebolo manio, tama te Mobo dage tomode bidibao. Dage te dugade digi me elalubo meni.<sup>9</sup> <sup>20</sup>Menio. Godigo te genuai naigo mu dage ma abelalio. Tama tibaso, penani şe isayü, te dagego tigi te dagego Godigo nogi ugwaba sabo kolesaga naga yao.

## Polgo te we sabo kolesagade po wali

(Dqı 7)

### Polgo te we sabo kolesagade ola mabo po wai

**7** <sup>1</sup>Megi da eno dagego enaba tolali pasde aşani po wei ponainogo homu ebao. Eno homugo te bidigo te we dwasianu me nogogo dişıqbaso da, te wiegi yai dao. <sup>2</sup>Tiali goli te haniani penani ebo kolesaga te tde elalubao. Tama dagego te kolesaga idali weyu, te tigidali bidi deli deligo te augwa we sao, tama tigidali we dabe deli deligo me te augwali sali bidi dali bidao. Te bidigo tigi te aga wego da, tama bidigo me geş siyu tama daş munu me olamuo. Te tiwai naga, wego tigi te aga bidigo da, tama wego me geş siyu tama daş munu me olamo dao. <sup>3</sup>(-) <sup>4</sup>Magi baso meni. Te wego aga tigi me tonalugobeo. Menio. Te aga bidigo tonalubao. Tama te tiwai naga, te bidigo aga tigi geş selama daş weyu munu me tonalugobeo. Menio. Te aga wego tonalubao. <sup>5</sup>Dage we de bidi si taluama bidibo, te me deligo me tudiba muyu tama aga tigi daş weyu geş siyu me elamuo. Te kolesaga ebo tagalao. Mu tama, duga si homu deliba munama, tama duga si tigi te pewardage sogo habu selabo homu elama, te duga si Godibolo gedu haluasa po wabo şe yainu osogo habu selabo homu ebaso da, te usu da. Tiali goli nosali te duga si homu deli elama te duga si tigi deliba ma taluao. Tiyu duga digi te duga tigi ma tonaluabo usu isayü, tama Satango dage usu siyu, te dagego dwai penani şe emainogo sinabuo.

<sup>6</sup>Te e we sabode wabo po, te dagego enabolo hanalu obaso tama eno te usu da wai. Tiali goli te eno dagego we sao po weyu te bomai po tiwai me ebeo. <sup>7</sup>Te eno homugo tigidali we bidi te ena digi tiwai bidimainu homu ebo dao. Tiali goli eno koneani, te Godigo tigidali bidi deli delibolo te haniani şe yabo kolesaga mani. Te me deligo te gasa tobage me tiwai tedali siyu, te gasa mego te gasa tiwai tedali sali.

<sup>8</sup>Tiali goli te we sisawai bidi me, te bidigo sisawai we badi, tama te augwa bidi dabe isai we dabebolo me, te augwalibolo eno te tiwai po

<sup>9</sup> 6:19 1 Ko 3:16; 2 Ko 6:16

obao: te augwali ena tiwai bidibaso da, te wiegi yai dao. Ena da te we sisayü enaduba bidibo bidi dao. <sup>9</sup>Tiali goli, te augwaligo homu me tigi te augwa digi bugagia tonaluabo homu usu yabo aq isabaso da, te augwa sao. Te augwali we sobaso da, te wiegi yai da. Tiyu augwaligo homu hogodaluyu tama dwai se ebo homu yabuo.

<sup>10</sup>Te we sali bidi me, te bidigo sali we te augwalibolo eno te bomai po mobao. Te eno digi eno bomai po me wabeo. Menio. Te dago Genuai Bidigo polobadu mani bomai po dao. Te e tiwai elalubao: te wego aga bidi me taga pelamuo wali. <sup>11</sup>Te aga bidi tagalai baso da, te aga olo bidimainao. Te meni baso da, te aga ma begasa pelama, tama aga bidi dali deli homu elama bidigi pao. Tama bidigo me te aga we munu me sela saşio.<sup>r</sup>

<sup>12</sup>Tama dage tomode gasa bidi dabe augwalibolo te ena digi eno naga te po obao, te dago Genuai Bidigo wali po meni. Eno e tiwai po obao: te ama me deligo we sali tama te wego te Kraisd konealubo po daş wasiqbaso, tama te we aga dali bidainogo homu ebaso da, te amago te aga me sela saşio. <sup>13</sup>Ma, we me deli selama tama te we aga bidigo te Kraisd konealubo po daş wasiqbaso, tama te bidi te we dali bidabo homu ebaso da, teda te wego aga te bidi me taga pelamu dao. <sup>14</sup>Magi baso meni. Te konealubo po daş wasiqwani bidigo te aga we dali mu keş pelama bidiyu, tama tebogo te aga te Godigo gedude te dwagi yai bidi ilaibao. Te tiwai naga te Kraisd konealubo po daş wasiqwani wego te aga bidi dali mu keş pelama bidiyu, tama tebogo te we aga te Godigo gedude te dwagi yai we ilaibao. Te meni yani da, teda dagego wai puluba dabe te augwali dwagi yai me egobeo. Tiali goli megi te augwali Godigo gedude wiegi yai elama mu bidalubao. <sup>15</sup>Tiali goli, te konealubo po daş wasiqwani bidi agai te aga Kraisd konealubo po daş wali we tagalabo homu ebaso da, te usu da, agai tagalomainao. Te tiwai kolesaga pedaliyu, te duga ama ma abe aga te kalabus tiwai me elalugobeo. Magi baso meni. Godigo dage i olama, te wiegi yai homu nagame ebo kolesaga wali pomainu ebo dao. <sup>16</sup>We, nago te naga bidi tau selama, te aga Godigo po wali pabo bidi pedelabo, ma meniabo, te nago konebeo. Te nage bidi, te nago naga we tau sobaso tama aga te Godigo po wali pabo we pedelabo, ma te meniabo me, te nago konebe dao.

#### **Te Godigo dabolo doba yali kolesagade te da bidaluao**

<sup>17</sup>Tiali goli dago Genuai Bidigo te deli deli bidibolo dobaba pali se eyu, tama aga te se eyu bidibadi te Godigo aga i obaso da, teda aga te se de naga bilao. Eno te tiwai bomai po te tigidali Godigo po wali pabo we bidi hanibolo bomonama ola mabo dao. <sup>18</sup>Te po page e tiwai dao. Te

---

<sup>r</sup> 7:11 Mat 5:32; 19:9; Mak 10:11-12; Luk 16:18



bidi me deli te Juda dabe augwaligo aga tigiwali sa muyu tama togolama tama te tiwai bidibadi Godigo aga i waliwe? Teda, agai te aga tigiwali togwali te ma dodolabo homu egio, te tagala. Te gasa bidi me deli aga tigiwali togosişwai bidibadi te Godigo aga i waliwe? Teda, agai tigiwali megi togogio. <sup>19</sup>Te tigiwali togobo kolesaga, te Godigo gedude te olo nai tiwai dao. Tama te tigiwali togosişbo kolesaga me te aga gedude te olo nai tiwai dao. Tiali goli te Godigo bomai po wali pabo kolesaga, te mu nai dao, te seşę dao, tede magigo meni wagimio. <sup>20</sup>Te bidi te seş me delide bidibadi tama Godigo aga i obaso da, teda aga te seşde me bididuo. <sup>21</sup>Te e tiwai dao. Te nage masigi sisşbo olo seş ebo bidi bidibadi tama Godigo nage i waliwe? Teda, tagala, magigo menio. Tiali goli, nago te masigi sisşbo olo seş ebo tagalabo sunumi elalubaso da, teda nago te sunumi wali pao. <sup>22</sup>Tiali goli te olo mu seş ebo bidi bidibadi tama Godigo aga i wali, megi da te aga dago Genuai Bidigo selama, tama te Genuai Bidigo gedude te aga olo seş ebo bidi me bidigobeo, te aga olo naga bidibao. Te tiwai naga, te olo wiegi yai bidali bidi, te olo seş me isşbadi tama Genuai Bidigo aga i wali, megi da aga te Kraisde masigi sisşbo olo seş ebo bidi tiwai pedalama bidibao. <sup>23</sup>Te Godigo te genuai naigo mu dage ma abelalio. Tama tibaso, dage te bidi dabede te masigi sisşbo olo seş ebo bidi tiwai me pedalgimio, te bidi dabego olo nigibo bomu yai po dologoba bidigi pigimio. <sup>24</sup>Te ama dedeo, te dage deli deli te niwai seş bidi bidibadi tama Godigo aga i obaso, aga te seşde naga te God dali deli homu eyu tama bidimainao.

**Polgo te we sisşwai bidi me te bidigo sisşwai we augwalide wali po**

<sup>25</sup>Te bidigo sisşwai we te augwalide po tama, eno te dago Genuai Bidigo bomai po me elalubo meni, tiali goli eno te ena homude po pusubao. Te Godigo olo tau sabo wiegi yai kolesaga enade elama, tama agai ena te homu mu naga ebo bidi ilali, tama dage enaba duga homugo tialubo te usu dao. <sup>26</sup>Eno homugo e tiwai kolesaga ebo te wiegi yai da wai: te megi tama sogo te genuai seşę dali dene dali si te daba pedalubao, gasa bidi dabego nogogo. Tama tibaso, dage tigidali deli deli te megi bidibo tiwai gilama te tama bidaluo, te eno homu dao. <sup>27</sup>Te nago we sai dawę? Tialima, te nago aga tagalabo sunumi gegebo seş me egio. Te nago we sabe dawę? Teda, nago te we sabo homu ma elamuo. <sup>28</sup>Tiali goli, te nago we siyu da, te dwai seş meni. Tama te gesi wegi te bidigo siyu da, te wegi agai te dwai seş me ebeo. Tiali goli te we sali bidi me te bidigo sali we te augwali seşę meba te tşde elaluaibao, tama eno homugo te tobage seş dageba pedalidali homu eyu eno e po obao, te dage megi bidibo tiwai gilama te tama bidaluo.

<sup>29</sup>Ama dedeo, eno te megi wali po te page e dao: te tş dali dagalu si silabo bodolu megi da pşwadage ebao. Tama tibaso, te bodolu sogo

elalubadi, te tõe elalubo naide naga dago homugo kone pelamuo. Te we elalubo bidi dabe te augwali te we meni yai bidi dabe bidibo tiwai bidao. <sup>30</sup>Tama te homu dene eyu gela wabo bidi dabe, augwali te gela wasiåbo bidi dabe tiwai bidalua. Te wiegi yai homu pemene ebo bidi dabe, te augwali wiegi yai homu pemene isaåbo bidi dabe tiwai bidao. Tama te doado bage abelebo bidi dabe, augwali te doado bage mu sisåbo bidi bidibo tiwai bidao. <sup>31</sup>Tama te tõe doado bage sabo bisnis se ebo bidi dabe, augwali te e tõe doado bage daå olalusiåbo bidi dabe tiwai bidao. Dago te tõe elalubo nai dali kolesaga dali si tede naga dago homugo kone pelamuo. Dago koneani, te e megi elalubo tõe silama tama hasegelama, tama te gasagi yai mu pedalaibao.

<sup>32</sup>Tama tibaso, eno homugo te haniani naide te dagego moni homu isaåyu tama dage bugagia bidao. Te we sisåwai bidigo, agai te dago Genuai Bidigo kolesagade te aga homugo kone palobo dao, te kolesaga aga bugagia wali pomainogo aga tama tebo dao. Agai te Genuai Bidigo homugo godolo yabo kolesaga yabo homu ebo dao. <sup>33</sup>Tiali goli te we sali bidi, agai te tõe doado bagede homugo kone palobo dao. Agai te aga wego godolo ebo kolesaga yabo homu ebo dao. <sup>34</sup>Tama tiyu, agai homu kolesaga pebeda paibao. Tama bidigo sisåwai we me, te gesi wegi me, agai te dago Genuai Bidigo kolesagade te agai homugo kone palobo dao. Aga homugo te aga tigi me te homu mobo bidi dali me te Godigo gedude bugagia wiegi yai mu bidimainu homu ebo dao. Tiali goli te bidigo sali we, agai te tõe doado bagede homugo kone palobo dao. Agai te aga bidigo godolo ebo kolesaga yabo homu ebo dao.

<sup>35</sup>Eno te megi aşani po te dage tau selama dage bugagia bidimainogo wali. Te dage palibo po me wabeo. Menio. Eno homugo te dage dolasa bidiyu, tama agade dagego homugo keå peyu tama sesemane sogo te dago Genuai Bidigo se emainogo, te nai me deligo te dage homu kegabi sidali weyu te po wali.

<sup>36</sup>Te bidi me deli aga homugo agai te dolo meniabo kolesaga te aga noma sali gesi wegi te dali te tiwai kolesaga ebaso, tama agai homu te wede hodoloyu bomu mu eyu, tama agai suali te gasa sunumi me elalusiåbaso da, teda te bidigo te wegi keåmainao. Te seåe sabo se ebeo. Te augwa si bidimainao. <sup>37</sup>Tiali goli, te bidi me deligo aga homude bomu eyu, tama te nai me deligo te aga selibo se me isaåbadi, tama aga homugo digi ebo tonaluyu, tama aga homude te po olama, te agai homugo te gesi wegi te augwaligo aga noma sali te aga olo mu bidimainogo ebaso da, te wiegi yai dao. <sup>38</sup>Tama tibaso, bidigo te gesi wegi sabo, te agai wiegi yai kolesaga ebaso. Tama te we sisåwai bidi, agai kolesaga te wiegi yai mu ebaso.

<sup>39</sup>Te we me deligo bidi te aga bidi bidibadi, te we te aga bidi dali naga keå pelama bidao. Tiali goli, te we aga bidi isibo si da, te we te bidi dali

me keçalubeo. Te aga gasa bidi dali pabo homu ebaso da, teda aga te bidi dali pomainao. Tiali goli aga te Godigo po wali pabo bidi dali naga pao. <sup>40</sup>Tiali goli ena digi eno homugo te tiwai homu yai: te bidi isai we aga olo bidainogo ebaso da, te aga wiegi yai homu pemene mu yaibao. Tama eno homugo te Godigo Tedali Mobo Bidi te enade me bidiyu, tama agai ena te kolesagade agai homu ola mani.

## **Te Godigo po odobo we bidi dabe augwaligo te tibo god dabeba ofa ebo kibu mi dabe tueibawe ma tugobewe?**

*(Dqı 8-10)*

### **Te augwaligo tibo godibolo ofa mani kibu mi te augwaligo tugowe obaso Polgo te po wai**

**8** <sup>1</sup>Dagego te enabolo aşena tolali pode, tede dagego e po me ena hanalu wali, “Te gasa we bidi augwaligo hasa ela munama, tama te tibo godibolo te ofa tiwai eyu, te hasa mi meba te tibo god pageba mubo dao. Tama da Godigo po wali pabo we bidi dago te tobage mi tubo te usu dawe, ma meniwe?” te po dagego enabolo aşena tolali. Te kolesaga ebode eno wabo po elalubao.

Dage mebago e po wabo dao, “Da tigidaligo koneani, te tibo god te olo nai dao.” Awe, te mu po dao. Tiali goli te olo konebo kolesagago te hagoma ebo kolesaga ebo homu hodolaibao. Tiali goli dago dena hasi te gasa we bidi dali wiegi yai homu eyu godolo ebo kolesaga selama, tama tebogo te da Godigo po wali pabo bomai we bidi pedalaibao. <sup>2</sup>Te bidi me deligo agai te nai me deli mu koneani homu ebaso da, teda te bidigo koneani kolesaga sqa pali, te usu yabo me elalubao. <sup>3</sup>Tiali goli, te bidi me deligo aga God dali dwagi yai homu eyu godolo ebaso da, teda Godigo koneama, te bidi te Godigo bidi dao.

<sup>4</sup>Te gasa we bidi augwaligo te tibo godiba ofa elama te mi dabe tubo kolesagade eno po megı obao. Dage mebago te tobage mi tuaio homu eyu tama dagego e po wabo dao, “Te tibo god te mu bidibo nai menio. Te olo piksa noma naga dao,” te po wabo. Awe, dago te po page koneani. Tama dage mebago e po me wabo dao, “Te god hauwa me elalubeo. Menio. Te God deli naga aga bidibao,” te wabo. Awe, te me dago koneani. <sup>5</sup>Mu tama, te gasa we bidi augwaligo te nogi “god” nogi ebo nai hauwa elalubao, tama te augwaligo hauwa naide nogi ilama, te “genuai bidi da” wai. Tama mu tama te “god” dabe, te dagalude, ma te tıde bidigi sogo da, <sup>6</sup>tagalao, te dade dago God deli naga te elalubao, te God Aya dao. Aga te tigidali nai page bidi. Tama dago agai se emainogo eyu da aga wai mu bidibao. Tama te Genuai Bidi deli naga elalubao, te Jisas Kraıs da. Agai te tigidali nai nigali. Tama dago bidibo ula te agadu sai dao.

<sup>7</sup>Tiali goli dage tomode te we bidi mebago te tibo godide te kolesaga kuna konebeo. Te mebago te polobadu te tibo godibolo mi ofa yali kolesaga hauwa sogo wali pedu geani. Tama megı me augwaligo homugo te gasa we bidigo te mi te tibo godiba ofa mu yali homu me ebo dao. Tama te homu ebadi augwaligo te tobage mi tubaso da, teda augwaligo homu tede seşę sobao. <sup>8</sup>Tiali goli dagego te kolesagade e po wei ponobo dao, “Te nai tubo kolesagago da te God paşa odasa me pogobeo. Te dago nai tusaşbaso, teda da te God gedude me saş pogobeo. Me ma, te dago tubaso da, teda da te God gedude wiegi yai me pedalogobeo.”

<sup>9</sup>Awe, te mu dao. Tiali goli dage mi tubo bage dage dua dao. Tiyu tama te tibo godibolo mani mi tubo seşę duga digi elama, tama te bomu meni yai bidi dabego sulama, tede saşade dolama, tama augwali te dwai seşęba tula muabuo. <sup>10</sup>Nage bidi te koneani kolesaga elalubao wida, te nage te tibo godigo lotu beba pelama, tama nage tede dulalu nai tueibao, tama bidi me deli te aga Kraıde konealubo po daş wabo kolesaga bomu meni yai bidi te agai nage subaso, te tebode te aga homu hodolama tama aga homu te mi tubo te dwai kolesaga da homu yali goli, te tibo godiba ofa yali nai tuabo homu yaıbao, tama agai te mi tueibao. <sup>11</sup>Tama tibaso, te nago koneani kolesagago te bomu isaşwani bidi dolali, te amade te Kraı aga isama tama aga ma sai dao. <sup>12</sup>Te ama mebago te Kraıde konealubo po daş wabo kolesaga te bomu me ebeo. Tama dagego te dwai seşę augwalıba elama, tama augwaligo te augwa gedude seşę ebo dwai ilıbaso da, te kolesagade te dagego dwai seşę te Kraıba digi yaıbao. <sup>13</sup>Tama tibaso, te nai tubogo eno ama te dwai seşęba tulalumainogo ilıbaso da, teda eno te mi munu ma tugobeo. Tiyu eno te eno ama te dwai seşęba tulalubo seşę ilıdallo.

### Te Godigo po sela pabo seşę bidi Pol bilali seşęde po

**9** <sup>1</sup>Te gasa we bidi me tau siyu tama augwali dolidali weyu, eno te gasa kolesaga me ebo dao. Ena olo mu bidıbo dao, te gasa bidigo enabolo “E tiwai kolesaga yao” te po wabo usu egobeo. Tama me ena te Godigo po sela pabo seşę bidi mu dao. Aga te guş pagede hodaluama tama nosali eno digi gedugo ena dago Genuai Bidi Jısaş mu suai bidi dao. Te eno dago Genuai Bidi tobade seşę yaligo tama te seşęde naga dage te God wali pabo we bidi pedalali. <sup>2</sup>Te bidi meba augwaligo ena te Godigo po sela pabo bidi meni da homu yali, tiali goli tagalao, duga koneani, ena te Godigo po sela pabo bidi bidıbo. Suao, ena te Genuai Bidigo po sela pabo seşę bidi bidıbao, tama te koneabo seşę te dagede elalubao.

<sup>3</sup>Te bidi mebago eno dagede maşigi saşbaso ena te Godigo po sela pabo bidi meni da wabo si, tama eno e tiwai po te augwalıba wei ponobo dao: <sup>4</sup>te eno ebo seşęde te Godigo po odobo we bidi augwaligo augwa doado bagego ena tau sobaso da, te dolo dawe ma meniwe? Te dolo mu dao. <sup>5</sup>Te

gasa Godigo po sela pabo şe ebo bidi dabe augwali deli deligo te Godigo po wali pabo we kenama, tama augwali te po pusubo şe eyu gasaba bilibadi te augwa we augwali dali hodobo pabo dao. Te dago Genuai Bidi Jisas aga ama dedego badi, te Pitago me te tama tebo dao. Tama ena me, eno we elalugi sogo da, teda eno me te tiwai eyu da te usugi mu da. <sup>6</sup>Te gasa Godigo po sela pabo şe ebo bage tigidali augwaligo te Kraisde po pusubo şe sesemane sogo ebaso, tama augwa nogogo te masigi sabo şe ebo meni. Te ena me Barnabas da sigo naga te tiwai me ebo usu meniwe? <sup>7</sup>Mena bidi te ami şe ebo bidigo tama aga digi te aga tubo nai abelegowe? Te menio. Mena bidigo te gi bulama tama aga te gide bulali nai sabo meniwe? Me ma te bidi mego te kibu meme dali sipsip dali hani tonaluyu tama aga digi te augwaligo ame pę me tugobewe? Woo, te tiwai menio. Agai te nai meba tueibao.

<sup>8</sup>Te eno tede bidigo homu naga wali pelama tama eno te tiwai po wabowe? Meni. Te bomai pode me te şe ebo bidigo aga pe masigi sabode te tiwai page elalubo po me elalubao. <sup>9</sup>Mosesgo te bomai pode te tiwai po aşani elalubao: “Te dagego wit ge dagalomainogo eyu tama te bulmakaugo te wit şaęaęo agabo şe ebaso, teda nago te aga pedauwali me paniamuo,” po wai. Te Godigo te bulmakau dabe augwa tubo nai sabode naga homu koneama wali dawes? <sup>10</sup>Menio, te agai te po bidi dabolo me wali homu ebaso. Awe, te po aşani te da tobade wali dao. Magi baso meni. Godigo te tiwai kolesaga emainogo yai: bidigo te gi tę elibo şe eyu, tama bidigo te gide inaiani nai sabo şe ebo bidi me, augwali si augwa yali şede te nai sabo homu elama tama te şe ebo dao. <sup>11</sup>Tialima, dago te Godigo po dagebolo pusubo şe yali, te dago te dagego homu noma bidi mobo tomode te ge bulali tiwai yai. Tama tibaso, dagego dabolo te tigi tau sabo nai naga mobaso, te dolo dawes ma meniwe? Te dobu si ebode te dage şaę paliwe? Te meni. <sup>12</sup>Te dagede bidi mebago te tigi tau sabo nai sabo usu ebo da wida, teda eno me te nai sigi sogo da, te usu mu egi dao.

Te nai dago sabo usu yaiba wali goli, te dago me sabeo. Menio. Dago te we bidigo Kraisde wiegi yai gesi po odobo sunumi te panibo te dago hagela homu yai. Tama tibaso te haniani şeęę dabe dago tolobo dao. <sup>13</sup>Te Moni Lotu Be tempel, te bede şe ebo bidi dabe, augwaligo te bede augwa nai sela tubo dao. Tama tiyu te Juda we bidi augwaligo te Godibolo maiabo nai magaselama, tama te be tomode te alta saide te nai Godibolo mabo şe ebo bidi dabe augwaligo da te alta saide ulubo nai hasa mi meba te sela tubo dao. Tama tiyu augwaligo augwa nai abelebo menio, te augwaligo Godigo şe ebode augwa nai tama sabo dao. <sup>14</sup>Tama te tiwai naga dago Genuai Bidigo te bomai po muani: te Godigo wiegi yai gesi po pusubo şe ebo bidi dabe, te şede augwaligo te wiegi yai gesi po sabo we bidigo tigi tau sabo nai meba somainogo yao.<sup>v</sup>

<sup>s</sup> 9:9 Bom 25:4; 1 Ti 5:18    <sup>t</sup> 9:11 Rom 15:27    <sup>u</sup> 9:13 Bom 18:1    <sup>v</sup> 9:14 Mat 10:10; Luk 10:7

<sup>15</sup>Tiali goli ena digi eno te tama tiwai nai me deli sisawai dao. Tama megi me eno te nai saiba olama eno e po me aşbeo. Menio. Te ena bolo hasia isimainao wai! Eno masigi sisabadi te şe ebo dao. Tama eno te şede wiegi yai homu pemene ebao. Tama bidi me deligo enabolo masigi mayu eno te wiegi yai homu pemene ebo page te dagala samainogo me egobeo. <sup>16</sup>Eno te Kraide wiegi yai gesi po pusubo, tede eno te ena nogi ugwaba sabo te usu menio. Te menio. Eno sunumi gasa me elalubeo. Dago Genuai Bidigo enabolo te şe naga mawai dao. Tama eno te wiegi yai gesi po pususiayu da, teda ena hobedagia mu bidaibao. <sup>17</sup>Te ena homugo digi eno te şe egi da, teda eno te şede sabo usu egi da. Tiali goli, eno homugo te şe eno yabo homu me isabaso da, teda Godigo te şe enabolo emainu mawai dao. <sup>18</sup>Tama tibaso, te şede eno mena nai saibawe? Te eno sabo nai te e tiwai elalubao: te eno sainu elalubo nai te Godigo wiegi yai gesi po pusubo şede sabo elalubo, te eno me sabo meni. Menio. Eno te wiegi yai gesi po pusama tama eno augwaliba olo mabo dao. Tama tede eno dwagi yai homu pemene ebo usu baso, te wiegi yai gesi po olo pusubo kolesaga da eno sabo nai tiwai dao.

#### **Pol te tigidali we bidigo şe ebo bidi tiwai bidali**

<sup>19</sup>Ena da te bidi me deligo olo şe ebo bidi me bidainogo me bidibe. Tiali goli te ena homugo ena digi te ena te tigidali bidi dologoba muyu, tama ena augwaligo olo şe ebo bidi tiwai bidainogo homu elama ebao, te eno bidi hauwa sabo homu elama tibo dao. Augwali Jisas wali pabo bage pedalomainogo eyu ena tama ebo dao. <sup>20</sup>Tama eno te Godigo wiegi yai gesi po te Juda dabebo pusubadi, ena te augwali tiwai bidibo dao. Ena digi ena te Mosesgo mani bomai po dologoba pabe, tiali goli eno te bomai po dologode bidibo Juda bidi dabe sainogo eyu tama ena augwali tiwai gilama te bomai po dologode bidibo dao. <sup>21</sup>Te Juda hani isawai bidi dabe, augwali te Mosesgo mani bomai po meni yani bidi dabego gedude, ena te Mosesgo mani bomai po meni yani bidi tiwai pedalali, te bomai po meni yani bidi dabe sainogo tama tiali. Tiali goli eno te Godigo bomai po tagalainogo ebeo. Menio. Eno te Kraisgo bomai po wali pabo dao. <sup>22</sup>Te Kraide konealubo po daş wabo bomo meni yani we bidi augwali eno tau sainogo eyu, tama ena te bomo meni yai bidi tiwai bidibo dao. Eno te tigidali sunumidu te gasa bidi dabego ebo kolesaga tigidali usu siyu, tama augwali tiwai bidibo dao. Augwali meba eno ma dobola somainogo tama ebo dao. <sup>23</sup>Eno te şe tigidali ebo te Godigo wiegi yai gesi po pusubo şe te ugwaba somainogo ebo dao, tama te wiegi yai gesi pogo dabolo mabo dwagi yai nai meba me eno somainogo eno te tiwai şe ebo dao.

#### **Te dago te nai sigi painu bomonama udaiyaşo po wali**

<sup>24</sup>Megi eno te po digi po begelama obao. Te udabo ususu si ebo bidi dabe te tigidali augwali udulama, tama te geanani bidi deligo naga te

dwagi yai nai sabo dao. Te dagego konebewe? Tialima, dage me te tiwai bomonama Godigo po bugagia mu wali pişo, agai te dagebolo dwagi yai şe emainogo yao. <sup>25</sup>Tama tigidali bidigo te nai sainogo homu eyu udabo da, te augwaligo homu dali, te augwaligo tigi ebo kolesaga dali, te tigidali augwaligo aiyaba elaluyu bugagia tonalubo dao. Te bidi dabego tama tiyu te geanani bidigo sabo dwagi yai nai sainogo tebo dao. Tiali goli te nai polo dolobo nai naga dao. Me ma, dago Godigo po wali peyu te me dolişabo nai sabo şe ebo dao. <sup>26</sup>Tama tibaso, ena digi me, ena te dwagi yai nai me sainogo eyu tama ena udabadi te eno gasaba tonono peyu me udagobe. Eno nogo wabi hwainogo, te eno nogo subigila şanama olo dali nogo me şagobeo, tama te wali naga me eligobeo. <sup>27</sup>Menio. Eno te ena tigiba mu eliyu tama aga ena homu wali pomainogo ebo dao. Magi baso meni. Eno te Godigo wiegi yai gesi po te gasa we bidi hauwablo pusubo dao, te augwaligo te po bugagia wali pomainogo ebo dao. Tiali goli nosali ena digi te eno te po bugagia wali pişyu tama ena tulaluidali weyu, tama eno bomonama te eno ebo kolesaga bugagia tonalubo dao.

#### Dago te tibo god dabe wali pelamuo

**10** <sup>1</sup>Ama dedeo, dage ede gegeda pelamuo: dago wai dabe tigidali te bidi meni yai dwai bulude bilibadi augwali te dagalu po dologode bugagia bidali. Tama augwali tigidali te şaşo naga pelama, tama te tamu ai nogeyu sana pai dao. <sup>2</sup>Tama tigidali augwali te poşe tamu ai side baptais sali tiwai yali, tama te baptais saligo augwali te Moses wali pomainogo sa muani. <sup>3</sup>Tama augwali tigidaligo te Godigo Tedali Mobo Bidigo augwali mani te nai nogi mana augwaligo tuai dao. <sup>4</sup>Tama augwali tigidaligo te Godigo Tedali Mobo Bidigo augwali mani ai te augwaligo tuali. Awe, augwaligo te Tedali Mobogo te genuai sau pado masigidu asobo ai tuali, te masigi augwali dali hodobo pai. Te masigi te Krais aga digi dao. <sup>5</sup>Te Godigo te tobage tau sabo şe tigidali augwali dali yali goli, agai te we bidi dago wai dabe hauwa tomode augwaligo kolesaga te Godigo godolo me isişwani. Mu menio. Magi baso meni. Dago koneai, augwali umabo te bidi meni yai bulude isilama, tama augwaligo tigi tede besela palama, wilalua pali, te bidi si sela naga bugagia sana pali. <sup>z</sup>

<sup>6</sup>Tama te augwalide pedalali şe tigidali te noma tiwai pedalali, te dago sulama tama dago wai dabe augwaligo te peşo yali tiwai te dago me te dwai şede peşo idali weyu dago şumainogo yali. <sup>7</sup>Tama suyu, tama dagego te tibo god dabebolo lotu po munu me wagimio, te augwali

<sup>w</sup> 10:1 Sai 13:21-22; 14:22-29    <sup>x</sup> 10:3 Sai 16:35    <sup>y</sup> 10:4 Sai 17:6; Nam 20:11

<sup>z</sup> 10:5 Nam 14:29-30



tomode mebago yali şe tiwai me egio. Te bukude te augwaligo te tibo god dali yali şede e po wai dao: “Te we bidi augwali dualama te nai tuyu weş tuyu elama, tama augwali hogodama tama augwaligo teşabi yali.”<sup>a</sup> <sup>8</sup>Tama dago me te penani ebo kolesaga me egimio, te augwali tomode mebago te yali kolesaga tiwai me egio, tama deli sogo naga te bidi sese umabo te 23,000 bidi te augwali isai dao.<sup>b</sup> <sup>9</sup>Tama dago me dwai şe eyu te Genuai Bidi usu me selamuo. Te augwali tomode mebago dwai şe eyu aga usu sobaso, tama te dwai hasamani dabego augwali gaş kelama tama augwali isai dao.<sup>c</sup> <sup>10</sup>Tama dagego dwai homu eyu Godibolo wado po me olamuo. Te dago waş dabe augwali tomode mebago te God dali dwai homu eyu wado po obaso, tama te bidi ela mubo ensel mobo bidigo te augwali ela munama tama augwali dolai dao.<sup>d</sup>

<sup>11</sup>Te şe dabe tigidali augwaliba pedalali, te gasa we bidigo sumainogo ebo şe noma tiwai pedalali. Tama dago me te tobage dwai şe idali weyu gasa bidi dabego te po te Godigo po bukude aşani. Magi baso meni. Te da megi bidibo sogo te tigidali nai silabo sogo paşa yagasai dao. <sup>12</sup>Tama tibaso, dagego duga digi bomogo bugagia dolalubo usu da homu eyu da, teda dage tulaluyu dolidali weyu dage bugagia suo. <sup>13</sup>Te dwai şe ilibo usu sabo şe dagebolo pedalobo, augwali tigidali te gasagi yai me egobeo. Menio. Te tigidali we bidibolo pedalobo usu sabo deli tigi poai şe pedalubao. Tama Godigo aga dage dali homugo keş pai bidi bidiyu tama aga daş wali po wali peyu, te usu sabo şe ebogo dagego bomu aiyaba elaluainogo ebo gogolama me sula tagalogobeo. Menio. Te dwai şe tomoba kegebo usu sabo şe dageba pedalubaso da, teda Godigo dage sana pabo tuş nigilaibao. Te tuş e dao: te agai dage daş walama, tama dage te usu sabo şede bomu elama dolalubo usu yaibao.

<sup>14</sup>Tama tibaso, eno abagi dede dabe muo, dagego te tibo god lotu beba nai tugi pabo kolesaga wi eyu tagalama, tama te kolesaga tudiba muo. <sup>15</sup>Dagego kolesaga elalubaso, tama eno dagebolo te po obao. Duga digi eno pusubo po dagalişo. Eno po e dao. <sup>16</sup>Te dago komunion tubaso da, dago te kapde gedu haluasa po olama tama Godibolo puba hwi po wabo dao. Te kapde elalubo wain aş da tigidali deli deligo tubo si da, tebogo dago te bidi Kraigo tigi kaneme dobayu tubo dao. Tama dago komunion tubadi, dago te dwasianu pebedama dobaba pabo bret, dago te bret tubo si da, tebogo dago te bidi Kraigo tigi mi dobayu tubo tiwai ebo dao.<sup>e</sup> <sup>17</sup>Te komunion tubo bret te deli naga elalubao, tama da we bidi hauwa elaluali goli, te tigi delide naga wadolali elalubao. Magi baso meni, da tigidaligo te bret deli naga tubo dao.

<sup>18</sup>Dagego te Israel dabe augwaligo yali kolesagade homugo kone palao. Godigo augwaligo yali dwai şe sela şawainogo eyu, tama augwaligo te

<sup>a</sup> 10:7 Sai 32:6 <sup>b</sup> 10:8 Nam 25:1-18 <sup>c</sup> 10:9 Nam 21:5-6 <sup>d</sup> 10:10 Nam 16:41-49

<sup>e</sup> 10:16 Mat 26:26-28; Mak 14:22-24; Luk 22:19-20



sipsip dali meme dali selama, tama te pris bidi dabego nogoba mawai. Tama menama, tama te pris bidi dabego te nai dabe ela munama, tama te mi te alta sai ugwadu daiba muyu, tama siago uluyu, tama Godibolo ofa tama mawai dao. Tama tiyu te nai sesali bage dali, te pris bidi dabe dali, augwali tigidaligo te altade ofa mani nai tuyu deli hani naga bidiyu tama bidali.<sup>f</sup> <sup>19</sup>Eno magi homu elama tama te po waliwe? ‘Te tibo god me aga mu bidibao, te agabolo ofa mabo tubo nai me te seğe nai mu dao,’ eno te tiwai homu elama te Israel dabego Godibolo ofa mabo kolesagade po waliwe? <sup>20</sup>Mu menio. Eno wali po page e dao: te Godigo po odisawai bagego augwa alta saide ofa ebo nai, te augwaligo dwai haubo noma bidi dabebolo te ofa mabo dao. Augwaligo te Godibolo ofa me mabeo. Tama dage te dwai haubo noma bage dali deliba sisinibo te eno godolo me egobeo, ena mu hagelabo. <sup>21</sup>Dagego te dago Genuai Bidi Kraisgo kap wain weğ tuyu, te dwai haubo noma bagede lotu wainogo eyu augwaligo kapde dali si weğ tuyu ebo usu me egobeo. Te dagego dena Genuai Bidigo ni nami tebol saide nai tuyu, te dwai haubo noma dabego lotu bede tebol saide nai dali si tuyu ebo te usu me egobeo. <sup>22</sup>Dago augwaligo te tibo god bagebolo ofa mani nai tuyu da, teda dago te Godigo da dali dwai homu ebo seğ ilaibao. Dago bomogo agai bomu aiyaba elalubo da, agawe? Te dago bomu usu menio.

### **Tigidali seğ ebogo dago Godigo nogi ugwaba sao**

<sup>23</sup>Dage tomode bidi mebagu e po obao, “Te mi tubo kolesagade te da olo bidibo dao, tede habu selebo po meni. Dago te mi tuyu da, te bogo dago Godigo bomu yai po me bologobeo,” augwaligo te po wabo dao. Awe, mu tama. Tiali goli te tigidali seğ ebogo da tau me sogobeo. “Te haniani seğ hauwa dago yabo te usu dao,” augwaligo te po me wabo dao. Tiali goli te tigidali seğ ebogo da God wali pabo bomu mabo meni. <sup>24</sup>Bidi me deligo aga digi naga bugagia bidabo homu me elamuo. Menio. Tigidali we bidi deli deligo te gasa bidi bugagia bidimainogo homu eyu tama augwali tau sabo kolesaga yao.

<sup>25</sup>Tigidali haniani mi augwaligo te maketde elalubo, te dagego abela tuyu da, te usu da. Po meni. Dagego homu hauwa elama tama ‘E mi augwaligo te tibo god me delibolo ofa maniwe, ma meniwe?’ te po hanalu wagio. <sup>26</sup>Magi baso meni. Dago koneani, te bukude elalubo po me deli e tiwai dao, “Te e tode, pağanalubo tigidali nai dabe dali, te Genuai Bidigo naga dao.”<sup>g</sup>

<sup>27</sup>Tama te Kraisba aga homu tigidali musiawani bidi me deli agai te dage meba i olama dage dali nai tuainogo ebaso da, tama dage pabo homu ebaso da, te usu da. Augwaligo dagebolo mabo te nai tigidali

dagego tuiào. Tama dagego homu hauwa elama ‘E mi augwaligo te tibo god me delibolo ofa maniwe, ma meniwe?’ te po wagio. <sup>28</sup>Tiali goli, te bidi me deligo te po dagebolo weyu, “Te mi da, te ofa yai mi da” po obaso da, teda te bidigo dagebolo wali po te dagego homugo koneama, tama aga tobade dagego te nai me tulamu dao. Dwai şę dwagi yai şę dagalabo homu dolidali weyu te nai tugio. <sup>29</sup>Eno dagebolo te po te dagego dwai şę dwagi yai şę dagalabo homu tobade te po wabeo. Meni. Eno te dagebolo te mi tubode po wali bidi agai te dwai şę dwagi yai şę dagalabo homu tobade te po dagebolo obao. Magi baso meni, te agai homu si eyu bidibao.

Dage tomode bidi me deligo te po hanalu waibao, “Ena digi ena haniani nai tubo usu yabo digi, tama gasa bidigo te ebo kolesaga dagalabo homugo digi eno ebo kolesaga magi baso te dagalabawe? <sup>30</sup>Te eno te tubo naide Godibolo puba hwi po olama te nai tuali goli, te gasa bidigo eno te puba hwi wali tubo naide te magi baso ena dali dwai po waibawe?”

<sup>31</sup>Te dage tomode bidi me deligo te po obaso, eno e po agabolo wei ponaibao, te dagego te nai tuyu me wę tuyu ebode, ma dage gasa şę ebo si da, dagego gasa we bidide homugo koneao, augwaligo Godigo nogi ugwaba somainogo eyu dagego duga kolesaga tigidali tama bugagia tiao. <sup>32</sup>Tama tiyu, dagego te Juda dabe me, te Grik dabe me homugo koneao, tama Godigo po odobo we bidi hani dabe me, tama dagego ebo şęde augwaligo God dali agai po dali si dali dwai homu idali weyu, dagego duga ebo kolesaga bugagia tonaluao. <sup>33</sup>Ena me eno te tiwai kolesaga ebo dao. Eno homugo te eno ebo kolesaga tigidalide te we bidi tigidali augwaligo dwagi yai homu naga emainao. Tama te homu ebaso, eno ena digi naga bugagia bidabo homu me egobeo. Meni. Eno homugo te eno tigidali we bidi augwali tau siyu, tama Godigo augwali ma dobola somainogo eyu, tama eno ena ebo kolesaga tigidali tama dodolobo dao.

### **Polgo po weyu te Tedali Mobo Bidigo mabo wiegi yai şę ebo me te lotu wabo wiegi yai kolesaga yabo po wali**

*(Daı 11-14)*

**11** <sup>1</sup>Te we bidi tigidali agai augwali tau somainogo eyu Krais agai aga digi aiyaba muyu bidali. Tama ena me eno agai te yali kolesaga wali pabo dao. Tama dage me dagego ena wali asiyu, tama te tiwai kolesaga naga yao.

#### **Polgo te lotu wabode tobolu halubo kolesagade ebo po**

<sup>2</sup>Dagego sesemane sogo ena homugo koneama tama eno te selama dagebolo mani po tigidali daı eyu wali pabo dao. Tama tibaso, eno te po obao, dagego wiegi yai kolesaga mu ebo dao. <sup>3</sup>Me ma, te dagego ena

te po hanalu wali, “Te da deliba sisinama tama Godibolo po weyu, tama Godigo po odoyu tebo sogo, te dago we dabe sibi augwaligo augwa tobolu te nami ugwago haluaibawe ma meniwe?” te po dagego ena hanalu wai dao. Tiali goli eno homugo hasia dagego te po konemainogo obao: te bidi Kraisgo tobolu bidi te God dao, tama tigidali bidigo tobolu bidi te Krais dao, tama wego tobolu te aga bidi dao. <sup>4</sup>Te dage deliba sisinama tama bidi mego tobolu haluama tama Godibolo po weyu, ma te Godigo po pusuyu da, te bidigo aga tobolu bidi Kraisba hale mabo dao. Te dwali. <sup>5</sup>Tama we me deligo te aga tobolu halusiãma tama Godibolo po obaso, ma Godigo po pusubaso da, te agai aga bidigo tobolu bidi tama tiwai bidiyu, aga aiyaba elalubo dao. Te dwali. Tama tiyu da, te aga te hale isãbo moni tũdu bilibo we tiwai dao. <sup>6</sup>Te tobage dwai penani kolesaga ebo we hale ilimainogo augwaligo aga tobolu nisi tigidali mu poabo dao. Tama te dage tomode te we me deligo aga tobolu halusiãma tama Godibolo po obaso, te wego te sẽ ebogo aga bidi tama aiyaba elalubaso, aga tobolu nisi mu poa yao. Tiali goli we aga tobolu nisi mu poabo te moni hale iliyu da, teda te we te lotu obadi aga tobolu te nami ugwago halumainao. <sup>7</sup>Bidigo te aga tobolu me haluamuo. Magi baso meni, te Godigo bidi nigali sogo agai aga digi tiwai nigalio, tama te bidibolo Godigo aga digi wiegi yai homu kolesaga tiwai mani. Tiali goli te we aga te aga bidigo kolesaga naga elalubo dao.<sup>h</sup> <sup>8</sup>Magi baso meni. Godigo bidi nigali te wego tigiyo me nigibeo. Menio. Agai we nigali te bidigo tigiyo nigai dao. <sup>9</sup>Tama Godigo te we homu koneama tama bidi nigilama aga tau somainogo me ebeo. Menio. Agai bidi homugo koneama tama wego aga bidi tau somainogo nigalio.<sup>i</sup> <sup>10</sup>Tama tibaso, te Godigo sẽ ebo ensel mobo bidi augwaligo te we aga bidi dologode bidibo sumainogo eyu, te wego aga tobolu te nami ugwago halumainao. <sup>11</sup>Tialima da we bidi te dena Genuai Bidi dali wadoloyu bilibode, tede te we naga tedali bidiyu tama bidi meniama, tama bidi naga tedali bidiyu, tama we meni eyu me ebeo. <sup>12</sup>Menio. Godigo hasia sogo te we bidigo tigiyo nigali, tama tialima megi te tiwai te agai bidi wego tigiyo nigilama pedalobo dao. Tiali goli God da te tigidali nai nigali bidi mu dao.

<sup>13</sup>Duga digi te eno megi wali po dagaliõ. Te wego tobolu halusiãma tama Godibolo po wabo, te kolesaga usu egowe? <sup>14</sup>Te we bidi dena kolesaga digi te tiwai dagebolo ola mabo dao: te bidigo bobage tobolu nisi elalubaso da, te dolo meni. <sup>15</sup>Tiali goli te wego bobage tobolu nisi elalubaso da, te aga wiegi yai au yabo nai elalubao. Magi baso meni, Godigo bobage tobolu nisi agabolo mani te aga tobolu halualumainogo yali. <sup>16</sup>Tialima, bidi me deligo te wego Godibolo po obadi aga tobolu haluabo sẽde konila po wabo homu eyu da, te agai koneao, dago gasagi

<sup>h</sup> 11:7 Gag 1:26-27    <sup>i</sup> 11:9 Gag 2:18-23

yai kolesaga me elalubo meni, tama gasa bulude bidibo Godigo po odobo we bidi hani dabego me te gasagi yai kolesaga me elalubo menio. Da tigidaligo te we aga tobolu haluabo kolesaga wali pabo dao.

### **Te komunion nai tubo po**

<sup>17</sup>Tialima megi eno te bomai po meba dagebolo mawainogo eba, tiali goli dagego te ebo şede te eno dage nogi ugwaba siyu dagego wiegi yai kolesaga mu ebo dao te eno wagobeo. Magi baso meni. Te dage sisinibo si, te wiegi yai kolesaga me pedalobeo. Menio. Te dwai kolesaga pedalobo dao. <sup>18</sup>Tede hasia bolo eno te po obao: te dage lotu wainogo sisinibo sogo, dage tedali tedela pabo dao. Eno te tiwai po dagede odobao. Tama eno homu te po meba te mu po dao, dagego te tiwai ebo dao. <sup>19</sup>Awe, eno koneani, te dage tomode te Godigo pode homu mu keş pai we bidi augwali hania hanilama pedalomainogo eyu, te dage bidi mebago pode dwasianu tedela pabo kolesaga te me sogo pedalaibao. Te eno koneani. <sup>20</sup>Tialima dage tigidali sisinibo sogo dagego te dago Genuai Bidigo komunion nai tubo kolesaga ebo dao. Tiali goli te mu meni. <sup>21</sup>Menio. Te dage tedelama, tama dage tigidali deli deligo te duga digi duga nai naga polo selama tama tubo dao. Tama me deligo nai tubo silişabadi, tama mego gasa bage dali aga nai dobasişma te aga nai tubo polo silama, tama te wain bomai aşı hauwa tulama wabo pabo bidi tiwai eyu ebo dao. <sup>22</sup>Magi basowe? Te dagego nai tuyu weş tuyu yabo be elalubao. Te duga bede duga nai hasia tuao, tama nosali deliba sisinama te komunion nai tuao. Ma, dagego homugo te Godigo po odobo we bidi te olo nai tiwai da homu elama, tama dagego te meba nai meni yani ama dedebolo hale mabo homu eba, agawe? Tede eno mena po dagebolo wagawe? Ma, eno dage nogi ugwaba somainogowe? Menio. Te şede te eno dage nogi ugwaba munu me sogobeo.

<sup>23</sup>Magi baso meni. Te eno dagebolo mani po te eno dago Genuai Bidide naga te ola mani po sali. Te e tiwai dao: te pio hulide Judasgo Jisas te Juda dabe boi bidigo nogoba musişabadi, te sogo pio hulide te Genuai Bidi Jisasgo <sup>24</sup>te bret selama, tama te naide Godibolo puba hwi po olama, tama te bret pebedama, tama aga dali bidali bidi dabebolo mayu, te po wali, “Te eno tigi dao, te eno dage tobade mobao. Dagego tigidali sogo tama tidu gebo si ena homugo koneao,” agai te po wai. <sup>25</sup>Augwaligo augwa hulide tuabo nai tula silibo si, tama agai te kap me selama, tama tiwai naga Godibolo puba hwi po olama, tama augwalibolo mayu te po wali, “Te kapde elalubo wain aşı te eno kaneme dao. Tama te kanemego eno te gesi daş wali po daş obao. Tigidali sogo dagego e aşı tubaso da, teda dagego tama tiyu ena homugo konealuo,” te bidi Jisasgo te po wai.<sup>j</sup>

<sup>j</sup> 11:25 Sai 24:6-8; Jer 31:31-34

<sup>26</sup>Tama tibaso, dago Genuai Bidi aga ma asisabadi te tigidali sogo dagego te bret dali te kapde dali we tubo si, dagego te aga isali po pusubo dao.

<sup>27</sup>Tama tibaso, bidi me deligo hasia bugagia homu kone palisiama tama Genuai Bidigo te bret dali te kapde ađ dali olo subigila tuali da, tebogo agai te Genuai Bidigo tigi me kaneme te dolobo tiwai ilali, tama aga tede sege elalubao. <sup>28</sup>Te komunion tubo sogo te bidigo aga digi homu bugagia osalama tama usu yali homu eyu da, teda aga te bret me te kapde te ađ tuao. <sup>29</sup>Magi baso meni, bidigo te dago Genuai Bidigo tigide homu kone bugagia palisiama, tama agai te bret me te we me olo subigila tuyu da, teda agai bret me we me tuali tede Godigo agabolo te sege menama tama dwai se agaba pedalaibao. <sup>30</sup>Te page delide naga te dage tomode we bidi hauwa augwali tigi bomo meniama, tama augwali gasi elama, tama augwali meba me isalio. <sup>31</sup>Te dago dena homu hasia bugagia osola suyu da, teda te Godigo dabolo te sege magobeo. <sup>32</sup>Tiali goli, Genuai Bidigo dago ebo kolesaga osola sulama, tama dabolo dene osogo mobaso da, tede te da aga wai bođ tiwai dodolobao. Agai tama tebo te da tode bidi dabe augwali dali nosali mu hagaidali weyu tebo dao.

<sup>33</sup>Tama tibaso, eno ama dedeo, dage te nai tuboba sisinainogo da, dagego te gasa bage augwali asobo hasia tonalua. <sup>34</sup>Te me deli moni nasi ebaso da, te agai bede nai tuao. Tiyu dage deliba sisinibo kolesagade Godigo dagebolo sege magobeo. Te gasa kolesagade elalubo po, te nosali ena dageba asobo sogo te eno dodolaibao.

### Te Tedali Mobo Bidigo haniani se yabo homu kolesaga dobabo dao

**12** <sup>1</sup>Eno ama dedeo, te Godigo Tedali Mobo Bidigo te haniani se yabo homu kolesaga dabolo mabode, te dagego tede gisiga koneşama bididali weyu eno tede dage homu dodolabo po me megı pusaibao. <sup>2</sup>Dagego koneanio, polobadu dagego te Godigo po odisabadi, te sogo augwaligo haniani kolesaga ebogo dage te po meni yai tibo godiba kekasa pelama, tama dagego augwali wali naga piduai dao. <sup>3</sup>Tama tibaso, eno homugo dagego hania koneao, te Godigo Mobo Bidi te bidi me deli dali bidama tama agabolo po mobaso da, te bidigo te po me wagobeo, “Jisas hagamainao, agaba dwai se pedalomainao,” te po munu me wagobeo. Me ma, te Tedali Mobo Bidi meni yani bidigo “Te Jisas da, te Genuai Bidi dao” po wabo te usu me egobeo.

<sup>4</sup>Te Godigo Tedali Mobo Bidigo haniani se yabo homu kolesaga dabolo olo mu mabo dao, tiali goli te Godigo Mobo Bidi deli naga elalubao. <sup>5</sup>Tama dago dena hasi haniani tau sabo se ebo, tiali goli dago Genuai Bidi deli naga bidibao. <sup>6</sup>Te haniani tau sabo se ebo homu kolesaga elalubo, tiali goli te God deligo naga te tigidali bidibolo bomu dali homu kolesaga dali si menama, tama augwaligo tigidali tau sabo se ebo usu yaibao. <sup>7</sup>Te Tedali Mobo Bidigo aga bomu te tigidali we bidi deli delibolo

pedalobo dao. Tama elama, tama augwali deli deligo te mani bomogo te Godigo po odobo we bidi hani tau sabo usu yaibao. <sup>8</sup>E tiwai dao. Te Godigo we bidi hani tomode te bidi me delibolo te Tedali Mobo Bidigo te we bidi dabebolo te Godigo wiegi yai homu kolesaga ola maiabo homu kolesaga agai olo mabo dao. Tama te gasa bidibolo te Tedali Mobo deligo naga te Godigo kolesaga te we bidi augwaligo bugagia konemainogo te po pusubo şe ebo homu kolesaga mabo dao. <sup>9</sup>Tama te Tedali Mobo Bidigo gasa bidi mebolo te bomu mayu, tama te bidigo Godiba aga homu tigidali mayu agaba tialubo kolesaga, te kolesaga bomu menama tama te bidigo homu si isişbadi tama agai genuai şe ebo usu dao. Tama gasa bidi mebolo te haniani gasi yai we bidi dabe usu ilabo bomu te Tedali Mobo Bidi deligo naga mabo dao. <sup>10</sup>Tama gasa bidi mebolo te Tedali Mobo Bidigo te haniani bomai şe yabo bomu mabo dao. Tama gasa bidi mebolo te Godigo po pusabo kolesaga agai mabo dao. Tama mebolo te haniani dwai haubo noma bidi dali te dwagi yai noma bidi dali dagalabo kolesaga agai mabo dao. Tama gasa bidi mebolo te Godigo Mobo Bidigo te tşde bidibo we bidigo homugo konesişwai po wabo kolesaga mabo dao. Tama agai me te gasa bidi me delibolo te hasia bidigo wabo po begelabo kolesaga olo mabo dao. <sup>11</sup>Eno megi tama nedada pali haniani şe yabo homu kolesaga augwali tigidali te Godigo Mobo Bidi deligo naga te nigibo dao. Te aga homugo digi agai te gasa şe yabo kolesaga te gasa bidi me delibolo dohayu, tama gasa bidi mebolo te gasa şe yabo kolesaga mayu ebo dao.<sup>k</sup>

### Da tigidali da tigi delide şe hauwa elalubo

<sup>12</sup>Te bidi Kraisi da te bidigo tigi me deli tiwai dao, tama te tigi nogo şaşı me, te haniani nai hauwa te elalubao. Tama te tigi haniani gasagi gasagi yai nai hauwa elaluali goli, te tigi deli naga dao. <sup>13</sup>Tama da me te tiwai elalubao. Te da meba te Juda hani da, da meba te Juda hani bidi aş isşwai bage dao, meba te masigi sisşbo olo şe ebo we bidi da, meba olo şe isişwani we bidi dao. Tiali goli te Tedali Mobo Bidi delide naga da tigidali te baptais selama tama deli tigi poaş naga pedelali, tama Godigo te Tedali Mobo Bidi deli naga dabolo mawai dao.<sup>l</sup>

<sup>14</sup>Te bidigo tigde, te dago koneani, te tigi te deli badu naga me elalubeo. Menio. Te aga haniani şe yabo nai elalubo dao. <sup>15</sup>Te şaşıgo te tiwai po wagi sogo da, “Ena te nogo meni, tama tibaso ena te tigde me wadoalubeo,” te şaşı aga togolama tedali agaduba elalueibao wabo digi, tagalao. Te meni. Aga te tigi badu naga me wadoalubo dao. <sup>16</sup>Tama ologo te po wagi sogo da, “Ena te gedu meni, tama tiyu ena te tigde me wadoalubeo,” te olo aga togolama tedali agaduba elalueiba wabo digi, tagalao. Te meni. Aga te tigi badu naga me wadoalubao. <sup>17</sup>Te tigi sesede

<sup>k</sup> 12:11 Rom 12:6-8    <sup>l</sup> 12:13 Rom 12:4-5

te gedu naga elalugi sogo da, magi ilama te agai po odaibawe? Tama te tigi sese te olo naga elalubaso da, teda magi ilama agai te nai denami ebo odaibawe? Meni, te tiwai usu egobeo. <sup>18</sup>Tiali goli tigi te tiwai me elalugobeo. Menio. Godigo aga digi homu wali peyu, te tigi tigidali badu te haniani şe yabo nai deli deli muna muna pali, te aga digi godolo yainogo tiwai dao. <sup>19</sup>Tama tigi sese te deli şe yabo nai naga elalugi sogo da, teda te tigi mu te menade elaluaibawe? <sup>20</sup>Tiali goli te tiwai me egobeo. Menio. Te tigi badu haniani şe hauwa yabo nai elalubao, tiali goli te tigi deli naga elalubao.

<sup>21</sup>Tama tibaso, gedugo te nogobolo te po wabo usu me egobe, “Te nogo, nage bidigi menigi sogo da, te enaduba deli ena bugagia bidigi dao.” Tama tobolugo me şağa bolo te po me wagobeo, “Te şağa, nage bidigi menigi sogo da, te enaduba deli digi ena bugagia bidigi dao,” te po wabo usu me egobeo. <sup>22</sup>Mu menio. Te tigi dabe badu dago te bomu meni homu yali, te me elalusişwani da, teda te tigi bugagia me elalugobeo. Mu menio. <sup>23</sup>Tama te tigi dabe badu dago homugo augwali te dwasianu dwali homu yali, te dago augwali bugagia tonalubo dao. Tama te tigi wiegi yai isişwani dabe badu, tede dago hale idali weyu, dago augwali te gudubo ugwago halua sabo dao. <sup>24</sup>Tiali goli te dago augwalide hale işabo badu, te dago gudubo ugwago halua sabo menio. Tiali goli Godigo te tigi dabe tigidali te deli badu wadolai elalubao. Tama me badu augwali te nogi meni yai tiwai elaluali, teda agai augwalibolo te nogi ma mayu ebo dao. <sup>25</sup>Agai tama tiwai ebaso, te augwali tedali me pebeda pogobeo, menio, te tigidali deli deli badu te augwaligo augwa hasi te gasa badu te deli şe tiwai naga eyu bugagia tonalumainogo ebo dao. <sup>26</sup>Tama tiyu te tigi me badu pedai badu dene eyu da, te tigidali badu dwai bidaibao. Tama me deli badu te nogi sobaso da, te tigi tigidali badu augwaligo te aga dali wiegi yai homu yaibao.

<sup>27</sup>Tialima dage da, da tigidali deliba wadolama, tama dage da te Kraisgo tigi tiwai dao. Tama dage deli deli te Kraisgo tigigo haniani şe yabo badu dabe dao. <sup>28</sup>Tama te Godigo po odobo we bidi hani tomode Godigo aga digi te şe dodolama, tama tigidali bidi te haniani şeba muani. Te hasia te po sela pabo bidi dabe nigilali, te si wali te Godigo po pusabo bidi dabe, te sela wali te agai po ola mabo tisa bidi dabe muani. Te dabe tуди badu nosali te bomu menama, te bomai şe ebo bidi dabe nigilali. Tama nosali ma te gasi yai bidi dabe usu ilibo bidi dabe elalubo, tama te we bidi dabe tau sabo bidi me, tama te haniani şe dabe tonaluabo bidi dabe muani, tama haniani homugo konesişabo pogo po wabo bidi nigilai.<sup>m</sup> <sup>29</sup>Magi yaliwe? Te Godigo po odobo we bidi hani tomode te tigidali bidi te Godigo po sela pabo şe ebo bidi dabe bidibo dawwe? Ma, tigidali te po

<sup>m</sup> 12:28 Ef 4:11

pusabo bidi bidibawe? Ma, tigidali te po ola mabo tisa bidi bidibawe? Ma, tigidaligo te bomai şe ebo bomo elalubawe? <sup>30</sup>Ma, tigidaligo te gasi yai bidi dabe usu ma ilibo bomo te elalubo dawe? Ma, tigidaligo te haniani homugo konesiabo pogo po wabo dawe? Ma, te tigidaligo te gasa bidigo wali po begelebo şe ebo usu egowe? Mu menio! <sup>31</sup>Tiali goli dagego bomu eyu tama godolo elama, te Godigo dabolo olo mabo agai we bidi hani tau sabo bomu tigidalide te polali nai sao.

Tama megi eno dagebolo te polalubo tu mu me deli te dagebolo ola maiabo homu ebao.

**Te we bidi dali dwagi yai homu eyu godolo mu ebo kolesaga po**

**13** <sup>1</sup>Te haniani dago homugo konesiabo pogo po wabo, tede eno po tamadi wai dao. Te eno te da tede bidibo we bidigo dena homugo konesiabo haniani pogo wabo, ma te tede bidi dabego wabo haniani po, ma te ensel mobo bidi dabego gasagi yai po me, te po tigidaligo eno po wabo usu eyu da, tiali goli eno te gasa we bidi dali dwagi yai homu eyu godolo ebo kolesaga esiayu da, teda eno po wabo te belo olo subigila elibo tiwai eyu, ma te moni nigo nigali habidi te olo elibo tiwai gilama yaibao. <sup>2</sup>Ma, eno te profet bidigo wabo po tiwai te Godigo po pusubo bomu elaluyu, tama eno te Godigo geme dualali po tigidali koneyu, tama eno gasa haniani homu kolesaga me koneyu, tama eno Godide bomai konealubo po daş elaluyu, tama eno te genuai bulu du gasaba pogolobo usu iligi da, ena te tiwai bidiyu, tiali goli eno te gasa we bidi dali dwagi yai homu eyu godolo ebo kolesaga esiayu da, teda ena te olo nai tiwai dao.<sup>n</sup> <sup>3</sup>Tama eno ena doado bage tigidali te magi nai meni yai we bidi dabe augwalibolo mena mena pelama, tama ena te Kraide boi bidi homu ebo bagego selama, tama eno tigi te siaba ulama tama ena te isiyu da, tiali goli eno te gasa we bidi dali dwagi yai homu eyu godolo ebo kolesaga esiayu da, teda te eno yali tigidali dwagi yai sego ena dwasianu tau sabo usu me egobeo.

<sup>4</sup>Te gasa we bidibolo wiegi yai homu eyu godolo ebo bidi agai e tobage kolesaga ebo dao. Augwaligo dwai kolesaga aga dali ebaso, te agai wei polo me ponogobeo. Te gasa we bidibolo wiegi yai homu eyu godolo ebo bidigo, te agai tigidali bidi tau sobao. Agai te doado bage hauwa elalubo bidi dali dwai homu me egobeo. Te gasa bidibolo wiegi yai homu ebo bidigo te aga digi aga nogi ugwaba me sogobeo. Tama agai dwai hagoma me egobeo. <sup>5</sup>Agai te bidi dabe augwali dali te kolesaga usu isawai bidigo ebo kolesaga ebo meni. Agai te aga doado bage dabede te nai yogo homu ebo meni. Te agai sebe polo me egobe, konila po polo wagobeo. Te augwaligo agabolo dwai se ilibaso, te agai te seđe aga homugo ma nededu gebo meni. <sup>6</sup>Te

<sup>n</sup> 13:2 Mat 17:20; 21:21; Mak 11:23



gasa bidigo ebo dolo isawai kolesagade te agai wiegi yai homu pemene me egobeo. Menio. Agai te we bidi augwaligo Godigo mu doloba pai kolesaga ebode te wiegi yai homu pemene agai ebo dao. <sup>7</sup>Te gasa we bidibolo wiegi yai homu eyu godolo ebo bidi agai tigidali seęę bugagia tolobo dao. Te tama tiyu, agai aga abagi dali homugo keęę pai bidi bidada pabo dao, te kolesaga me sia sogobeo. Te aga dali dwai seęę yali abagi, tede agai wiegi yai homu pemene eyu tama te bidigo homu hasegelebo aga bugagia tonalubo dao, agai te kolesaga ebo tagalogobeo. Te tigidali seęę sabode te aga bomo elama bugagia dolalubo dao, aga munu me seęę polo egobeo.

<sup>8</sup>Te Godigo aga we bidibolo te tau sabo bomu osogo mawai dao. Agai bidi mebolo te Godigo po pusubo bomu olo mayu, tama gasa bidibolo te haniani gasagi yai homugo koneşıbo pogo po wabo bomu olo tama mayu, tama tedali bidibolo gasa haniani homu kolesaga koneabo bomu mayu ebo dao. Te tobage mani seęę yabo bomu te osogo elalubo nai naga dao. Tiali goli te gasa we bidi dali dwagi yai homu eyu godolo ebo kolesaga da, te gamonabo kolesaga mu dao, te munu me siligobeo. <sup>9</sup>Te megi dago haniani homu kolesaga koneabo bomu te sese meni, te sqa pali. Tama te Godigo po pusubo bomu me, te sese meni, te sqa pali. <sup>10</sup>Tiali goli nosali te sese usu mu yai nai asiyu, tama te sogo te sese isawai sqa pali nai dabe tigidali silaibao, te augwaligo seęę me meni. <sup>11</sup>E tiwai yaibao. Polobadu ena dwasianu ogwa bidibadi, te sogo eno dwasianu ogwago po wabo tiwai yai dao. Eno te dwasianu ogwago homu ebo seęę tiwai yai dao. Eno te dwasianu ogwago homu dodolobo kolesaga tiwai me eyu bidai dao. Eno kuna koneşıbaso, eno haniani seęę sqa peyu bidali. Tiali goli nosali ena genuai bidi pedalama, tama eno bugagia konebaso, eno te dwasianu ogwago yali kolesaga yali te tagalai dao. <sup>12</sup>Dago te aęę dulade subadi, te dena gesabidi dago kuna subo meni, te dwasianu hulua sai tiwai subo dao. Tama te tiwai me, dago God gisiga mu konebo menio. Tiali goli te sogo nosali da, te dago Godigo gesabidi mu dolo sueibao. Megi dago te God kuna konebeo, te me badu naga koneani. Tiali goli nosali da, te dago aga mu koneyu, te agai da mu konebo tiwai gilama yaibao.

<sup>13</sup>Tama te sogo asisabadi, te kolesaga sela sesemane sogo elalubao, te homugo keęę pabo kolesaga dali, te dwagi yai homu eyu bugagia tonalubo kolesaga dali, te we bidi dali wiegi yai homu eyu godolo ebo kolesaga dali, te augwali sela sesemane sogo elalubo dao. Tiali goli te kolesaga selade te polalubo kolesaga me deli, te gasa bidibolo wiegi yai homu eyu godolo ebo kolesaga elalubo dao.

**Te Godigo Tedali Mobu Bidigo mabo polalubo bomu sabo homu eyu, te dagego Godigo po godolo homu elama pusao po wai**

**14** <sup>1</sup>Te gasa we bidi dali wiegi yai homu eyu godolo ebo kolesaga da te polalubo kolesaga elalubaso, te dagego bomu eyu te kolesaga

bugagia wali pao. Tama tiyu, dagego te Tedali Mobo Bidigo maiabo tau mabo bombo sabo homu bombo eyu godolo tigidali sogo iduao. Tiali goli te maiabo bombo dabe tomode te Godigo po gasa we bidi dabebolo pusubo bombo te polalubo bombo elalubaso, dagego te bombo sabo homu hasia yao. <sup>2</sup>Magi baso meni, te t de bidibo we bidigo konesi bo po wabo bidi agai te we bidibolo te po wagobeo. Menio. Agai te po wabogo te Godibolo naga wabo dao. Magi baso meni, te we bidi augwaligo agai wabo po page konegobeo. Te Tedali Mobo Bidigo bomogo te agai te geme dualali po page wabo dao. <sup>3</sup>Me ma, Godigo po pusubo bidi, agai po te we bidibolo weyu, tama te pogo augwa homugo God dali ke  pabo kolesaga tebolo bombo mabo dao, tama augwaligo kolesaga wiegi yai emainu homu hodolama, tama augwali homu nagame ilibo dao. <sup>4</sup>Te t de bidibo we bidigo konesi bo po wabo bidi, te aga digi naga tau sabo dao. Tiali goli te Godigo po pusubo bidigo, agai te Godigo po odobo we bidi hani sese tau sabo dao. <sup>5</sup>Eno homugo dage tigidaligo te we bidigo konesi bo pogo po omainogo te homu godolo ebao. Tiali goli eno homugo te Godigo po dagego pusumainogo te homu mu godolo ebao. Magi baso meni, te Godigo po hania pusubo bidi agai te we bidi tau sabo s  ebogo te we bidigo konesi bo pogo po wabo bidigo tau sabo s  aiyaba elalubo dao. Tiali goli, te we bidi augwaligo te po page hania konemainogo eyu, bidi mego te po page begeleyu da, teda te usu da, te po pusubo bidi dali te we bidigo konesi bo pogo po wabo bidi dali sigo tau sabo s  te tiwai si dao.

### **Dago Godigo po dena pogo pusao po**

<sup>6</sup>Eno ama dedeo, dagego te po homugo bugagia koneao. Ena te dage bidibo madi aselama, tama eno po te we bidigo konesi bo gasa pogo naga wainogo eyu da, tiali goli te Godigo enabolo waselali po meba te eno dagebolo wasi yu, ma eno wiegi yai kolesaga dagebolo masi ma, ma te Godigo po eno pususi ma, te eno dage me po ola masi baso da, teda eno te we bidi konesi bo pogo wabogo dage bugagia tau sogobeo. Mu menio. <sup>7</sup>Te bidibo ula meni yai nai, te ona me gita, te tiwai naga elalubao. Te agai haniani po dolo bugagia wasi baso da, teda dago magi ilama te agai dogonide wabo po bugagia odaibawe? Te usu egobeo. <sup>8</sup>Ma, te ami enesigi bidi dabe augwaligo te bu wabo nai biugel bu wabo odobo si, augwaligo konebo dao, te hw bo sogo asai dao, te homu yaibao. Tiali goli ami bidi me deligo te biugel naigo dolo hwa wasi baso da, teda dego te w bi hw bo sisi elaluaibawe? Bidi meni. <sup>9</sup>Dage me, dage te tiwai gilama naga yaibao. Dagego duga lotude te bidi dabego konesi bo gasa pogo po obaso da, magi ilama augwaligo te po page koneaibawe? Menio. Teda dagego po olo madi hagagi paibao. <sup>10</sup>Mu tama, te haniani we bidi hani augwaligo te haniani po hauwa e t de elalubao, dago te haniani po nedebo usu egobeo. Tiali goli te po me deli olo me elalubeo.

Te tigidali pogo te page elalubao. <sup>11</sup>Tialima, te bidi me deligo pusubo po page eno me konesiąbaso da, te agai homugo ena te gasa digibulu bidibo bidi hani da homu yaibao. Tama eno me eno homugo te po wabo bidi te gasa digibulu bidibo bidi hani da, te homu ebo dao. <sup>12</sup>Dagego me dagego te we bidigo konesiąbo pogo po weyu da, teda dage tama tiwai ebo dao. Tialima, dagego te Tedali Mobo Bidigo olo maiabo tau sabo bomo dabe sainogo homu godolo yaligo da, teda Godigo we bidi hani bugagia dolalumainao homu eyu, dagego te augwali wiegi yai mu tau mabo bomo sabo homu bomonama eyu, tama te Mobo Bidibolo te bomo da mao weyu bidia.

<sup>13</sup>Tama tibaso, te we bidi dabego konesiąbo pode po wabo bidigo, agai te po begelabo bomu somainogo eyu tama agai Godibolo te bomu ena mao po hanalu wao. Tama tiyu, tama agai te bomu sobaso da, teda agai te aga gasa pogo wabo po begelama, tama gasa we bidi augwaligo te po page hania koneaibao. <sup>14</sup>Magi baso meni, eno te da we bidigo konesiąbo pogo Godibolo po weyu da, teda eno mobo bidigo me te gedu haluasa po wabo, tiali goli tebogo eno homu kolesaga tau sabo meni, te olo elaluaibao. <sup>15</sup>Tama eno magi egowe? Te eno ena homu ogwa wai dali te da we bidi konesiąbo pogo Godibolo po weyu aga nogi ugwaba saibao, tama ena homugo kone paliyu tama waibao. Eno aga nogi ugwaba sabo teąbi po te konesiąbo pogo te eno homu ogwa waigo weyu, tama te eno homugo dali me te teąbi po waibao. <sup>16</sup>Te nago tama tisiąma, tama naga homu ogwa waigo naga te lotu wabo sogode nago Godibolo puba hwi po weyu da, tama tede bidibo olo bidi me deligo te po konesiąwani da, teda magi ilama agai te nago puba hwi po walide te “Amen, mu dao” po agai wagowe? Te usu me egobeo. Agai nago te wali po me konegobeo. <sup>17</sup>Mu tama, nago Godibolo po wali te wiegi yai wali, tiali goli nago te po waligo te gasa bidi homu tau siyu bomu me mabeo.

<sup>18</sup>Dagego te da tęde bidibo we bidigo dena homugo konesiąbo pogo me sogo Godibolo po wabo dao. Awe, te usu da. Eno me hauwa sogo tama tebo dao, tama te seęde eno dage aiyaba elalubo dao. God agai te pogo po wabo bomu ena mobaso, eno agabolo puba hwi po wabo dao. <sup>19</sup>Tiali goli te Godigo po odobo we bidi sisinibode, eno homugo te eno te augwaligo konesiąbo po hauwa mu wagobeo. Menio. Eno homu e tiwai dao, te dena pogo weyu, eno augwali tau siyu, te ola mabo po bugagia ola momainogo eyu, te eno dwasianu pogo hania waibao, te usu dao.

<sup>20</sup>Eno ama dedeo, dagego te haniani seęde dagalabo homude dage te wai puluba tiwai me bidilamuo. Menio. Te dwai kolesaga ebode dage te dwasianu wai puluba bidibo tiwai bidao, te dwai kolesaga egimio. Tiali goli duga haniani seę ebo dagalabo homude, dage te genuai bidi tiwai pedaliao. <sup>21</sup>Te Godigo bomai pode augwaligo te tiwai po polobadu aşai dao, te gasa konesiąbo pogo wabo kolesagade,

“Genuai Bidigo te po wai, ‘Te gasa po wabo bidigo pedauwalide, tama te gasa bidi hanigo pedauwalide te eno po e we bidi hanibolo mawaibao. Tiali goli tebogo me usu egobeo, te augwaligo eno po wali me pogobeo,’ agai te po wai.”<sup>o</sup>

<sup>22</sup>Tama tibaso, dago koneani, te da t̄de bidibo we bidigo konesiābo gasa pogo po wabo kolesaga da, te muani sa dao, te Kraisba augwa homu tigidali musiāwai bagego augwaligo te tobage po wabo odoyu, tama augwaligo Godigo bomo meba sueibao. Me ma, te Godigo po pusubo kolesaga da, te me te muani sa dao, tama te po odoyu bugagia wali pabo we bidi augwaligo tedu koneaibao, augwaligo augwa homu tigidali te Kraisba mu muai dao. <sup>23</sup>Tama tibaso, te dage Godigo po odobo we bidi tigidali dage deli madi sisinama, tama dage te sogo po wabo bage tigidaligo we bidigo konesiābo gasa gasa pogo po weyu, tama bidi mebago konesiāma, tama Kraisba augwa homu musiāwani bidi dali, augwali te tomoba asiyu da, teda augwaligo dagede te po waibao, “Dage esela pobao” waibao. <sup>24</sup>Tiali goli, dage tigidali deli deligo Godigo po dena pogo pusubaso, tama Kraisba augwa homu musiāwani bage, ma bugagia konesiāwani bidi me deli, aga te tomoba asobaso da, teda dage tigidaligo pogo te bidi homude enaibao, tama dage tigidaligo pogo aga po t̄ ela mabo tiwai eyu tama aga koneaibao, Godigo gedude aga dwai s̄ yali s̄eḡ elalubao. <sup>25</sup>Tama tigidali po aga homude geme dualaluali, te agai hania pusaibao. Tama aga ge neyu, aga gesabidiba basi gulama, tama God nogi ugwaba siyu, tama hanilama te po waibao, “Mu tama, God te dage tomode bidibao,” agai te po waibao.

### **Te lotu po wabo s̄eḡ tigidali dolo pedalomainao**

<sup>26</sup>Ama dedeo, dagego magi yaibawe? Dage lotu po wainogo eyu sisinibo sogo, dage tigidali deli deligo te duga hasi tau sabo s̄eḡ elalubao. Me deligo te Godigo nogi ugwaba sabo balia weyu, tama me deligo te dage po ola mabo s̄eḡ eyu, tama me deligo te Godigo agabolo tamadi mani po, tama agai te po pusaibao. Tama me deligo te dago konesiābo gasa pogo po weyu, tama mego te po begelebo s̄eḡ elalubao. Dagego ebo s̄eḡ tigidali ebogo te dage Godigo po odobo we bidi tau siyu bomo momainogo iyao. <sup>27</sup>Tama mebago te da t̄de bidibo we bidigo konesiābo pogo po wainogo homu ebaso da, teda sigo ma selago naga yao. Te usu dao. Tama augwaligo po hodobo me olamuo. Menio. Me deligo bolo po hasia olama, tama gasa aga po nosali weyu yao. Tama bidi me deligo te augwaligo wali po page begelemainao. <sup>28</sup>Tama te po begelabo bidi meni baso da, teda te we bidigo konesiābo pogo po wabo bidi te dage Godigo

po odobo we bidi sisinani sogo po wabo pedauwali pania sao. Agai aga digi homu tomode God dali naga aga po mimainao. <sup>29</sup>Tama te Godigo po pusubo bidi si ma sela, augwaligo te Godigo po pusumainao. Tama gasa bage augwaligo te pusali po dagaloyu tama osola suyu miao. <sup>30</sup>Tama me deli dulaluali bidibolo, tama Godigo Mobo Bidigo po me deli agabolo te sogo naga ola mani po wainogo ebaso da, teda te hasia doligulama po wabo bidi, te aga wabo po silao, te Godigo agabolo po tamadi mani bidigo te mani po omainao. <sup>31</sup>Te kolesaga ebogo da, teda dage tigidali deli deligo Godigo po pusagameo, tama dage tigidali we bidigo koneama kolesaga selama, tama dage tigidali bomo somainogo yaibao. <sup>32</sup>Te Godigo po pusubo bidi dabe augwaligo augwa Godigo Mobo Bidigo nogode sali po pusubo bomu augwa digi tonalumainao. <sup>33-34</sup>Magi baso meni, Godigo te da dago lotu po wabode te subigila ebo homu me ilibo meni. Te menio. Agai da deli homude naga nagamea homu elama bidimainogo ilibo dao.

Te Godigo po odobo we bidi sisinibo sogo te we dabe sibigo po me olamuo, augwali pedauwali naga pania sao. Da Godigo po odobo we bidi hani te tigidali tõe bidiyu, da tigidaligo tama naga tebo dao. Te we dabe sibi augwali te Godigo po odobo we bidi tomode me polalugobeo. Augwali te dologode bidao, te Juda dabego bomai pode wali po gilama yao. <sup>35</sup>Te we dabe sibi augwaligo te lotude odali po me deli page koneainogo da, teda augwaligo augwa bidibolo augwa bede hanalu wao. Ma, te Godigo po odobo we bidi sisinibo sogo wego po obaso da, agai te dolo isşwai hale ilibo kolesaga ebao.

<sup>36</sup>Awe, eno koneani, te dagego eno megi tama wali po bolobo dao. Te dage tomode te dage deliba sisinibo sogo te we mebago po pusubo dao. Magi basowe? Dage te Godigo wiegi yai gesi po page bage dagede da agawe? Dagego naga te Godigo po siyu, tama gasa we bidi augwali meni yaiba agawe? Te meni. Dagego te tigidali gasa tõe bidibo Godigo po odobo we bidi hani augwaligo ebo kolesaga wali peyu, tama te we dabe sibigo lotu po obadi po pusubo habu selao. <sup>37</sup>Tama bidi me deli aga homugo digi aga te Godigo po pusubo bidi da te homu ebaso, ma aga digi homugo te Godigo Tedali Mobo Bidigo agabolo te Godigo we bidi tau sabo şe agabolo mani, te homu eyu da, teda aga koneao, te po eno dagebolo megi aşani te Genuai Bidigo bomai po dao. <sup>38</sup>Tiali goli aga te tiwai homu me isşyu da, teda dago me aga te Godigo po pusubo bidi da te homu me egobeo.

<sup>39</sup>Eno ama dede dabeo, eno wali po page e dao: dagego te Godigo po pusubo şe emainogo eyu duga homugo bomu elama godolo yao. Tama me, dagego te da tõe bidibo we bidigo konesişbo gasa gasa pogo te Godigo nogi ugwaba sabo şe te habu munu me selamu dao. <sup>40</sup>Tiali goli dage deliba sisinama tama lotu po obadi, te subigila egimio, te şe dodolama tama wiegi yai naga pedalomainao.

## Te isali we bidi dabe augwali ma hodalueibao

(Daı 15)

### Te Kraıs isilama tama ma hodalualı po

**15** <sup>1</sup>Eno ama dedeo, megi eno homugo te eno dagebolo polobadu pusali wiegi yai gesi po, te po pagede dage homu ma hodolainogo eno homu ebaö. Dagego te wiegi yai gesi po salio, tama dage tede bomö elama dolalubo dao. <sup>2</sup>Tama Godigo te wiegi yai gesi pogo naga dage ma dobola siyu wiegi yai madiba mubao. Dagego te eno dagebolo pusali wiegi yai gesi po dali duga homugo mu keę peyu da, te pogo agai dage ma dobola saibao. Te dagego te tiwai isayı da, teda dagego ölo naga Kraısba duga homu tigidalı muyu agaba tialuali.

<sup>3</sup>Te eno polasa po dagebolo hasia bolo mani, te eno me eno polobadu te po naga salı. Te po e tiwai dao: te Kraıs isilama dago dwai seęę tigidalı sela samainogo yalı, te Godigo po bukude polobadu aşani po tama usu nani.<sup>p</sup> <sup>4</sup>Tama augwaligo aga te masigi dedage gų pageba mugı pai. Tama sela sogo wabode Godigo aga ma hodolama, tama aga me bidibao, te Godigo po bukude polobadu aşani po tama usu numainogo yai dao.<sup>q</sup> <sup>5</sup>Tama nosalı aga Pita bidibo madi pedalalı, tama nosalı te aga seę bidi nogo si olama saęę badu si bidi bidibo madi pedalama augwaligo aga sualı.<sup>r</sup> <sup>6</sup>Tama nosalı ma dago ama dede hauwa dali augwaligo aga sualı, te bidi sese hauwa 500 bidi augwaligo sualıo. Tama te sualı ama dede augwali meba nosalı isiyu yai, tialı goli hauwa augwali megi me bidibao. <sup>7</sup>Tama nosalı ma Jemsgo aga sualı. Tama te sogo nosalı aga seba tagala palalı bidi dabego me aga sualıo. Te tiwai aga isilama ma hodalualı po eno dagebolo hasia bolo öla mani.

<sup>8</sup>Tama augwaligo sula silama, tudi badu mu aga te ena geduba me pedalalı, ena te wai bų tiwai te aga idago te ame nesıabo sogo ame nani.<sup>s</sup> <sup>9</sup>Magı baso meni. Ena da, ena te Godigo po sela pabo bidi dabe augwali tomode te dwasianu gagayalı. Tama ena te bidi augwaligo te Godigo po sela pabo bidi nogı wabo usu me egi menio. Magı baso meni, polobadu eno te Godigo po odobo we bidi hani dolobo seę hauwa mu yai dao.<sup>t</sup> <sup>10</sup>Tialı goli Godigo ölo mu tau sabo kolesagago ena tau selama, tama agai ena megi bidibo tiwai ilalı, ena te aga seę ebo tagala palalı bidi dao. Tama agai ena ölo mu tau salı wiegi yai kolesaga te ölo me hagabeo. Mu menio. Eno aga seę bomö mu elama yai, te gasa Godigo po sela palı bidi dabe augwaligo yalı seę eno yalı seę ebogo aiyaba elalualı. Tialı goli eno ena digı me ebeo. Menio. Te Godigo ölo tau sabo wiegi yai kolesaga ena

<sup>p</sup> 15:3 Ais 53:5-12   <sup>q</sup> 15:4 Tib 16:8-10; Mat 12:40; 28:16-17; Mak 16:14; Luk 24:36; Jon 20:19; Tpi 2:24-32   <sup>r</sup> 15:5 Luk 24:34   <sup>s</sup> 15:8 Tpi 9:3-6   <sup>t</sup> 15:9 Tpi 8:3

dali bidiyu, agai naga te şe ebo dao. <sup>11</sup>Tiali goli te eno ma augwaligo te gesi wiegi yai po pusali, te tagalao. Te magigo meni. Da aga tagala palali bidi tigidaligo te Kraisde po naga pusubo dao. Tama dagego te pode naga konealubo po duga homugo dađ olama tama Kraisba homu dađ elalubo dao.

### Nosali tigidali isali bidi ma hodalobo kolesagade po

<sup>12</sup>Sesemane sogo da Godigo gesi wiegi yai po pusubo bidi dabe dago te Krais isama tama Godigo aga ma hodolali po pusubo dao. Tama tialigo da, magi ilama tama dage tomode meba augwaligo e tiwai tibo po weyu ebo dao: “Te isai bidi, aga ma hodalugobe, dago te homu ebo da,” te po wabo. <sup>13</sup>Edao. Te isai bidi mu ma hodalobo usu menigi sogo da, teda Godigo Krais te gų pagede ma hodoligi meni da. <sup>14</sup>Tama mu tama Godigo Krais ma hodoligi menigi sogo da, teda dago te pusubo po, te po olo nai tiwai gagagi da, tama dagego Kraisde konealubo po dađ olama agaba homugo tialubo kolesaga, te me te olo nai tiwai pedaligi da. <sup>15</sup>Tama te tiwai da wida, teda me da te Godigo po pusubode te da tibo po wabo bidi tiwai pedalaibao. Magi baso meni, dago te Godide po weyu tama dago te agai Krais te gų pagede ma hodolali po dago hanilama hania wali. Tiali goli Godigo te isai bidi ma hodolobo meni eyu da, teda agai te Krais me ma hodolobeo. <sup>16</sup>Awe, mu tama Godigo te isai bidi ma hodolobo meni da wida, teda Godigo te Krais me hodoligi meni. <sup>17</sup>Tama mu tama Godigo te Krais ma hodoligi menigi sogo da, teda dagego te Kraisba duga homu tigidali mubo kolesaga ebogo te duga tau sabo usu me egi menio. Duga dwai sege dali bididubadi gebo dao. <sup>18</sup>Tama me elalubao, te Kraisde konealubo po dađ olama isali we bidi dabe, augwali me hagawai dao. <sup>19</sup>Te Krais agai da ma dobola somainogo eyu, dago dena homu tigidali agaba munama tama agaba tialuyu, tama dwagi yai homu eyu aga ma asobo tonalubo dao. Tama tebogo da e tde bidibo sogode naga da tau siyu da, teda da hobedagia mu bidibao. We bidi augwaligo da dali homu dene ebogo te gasa we bidide homu dene ebo şe aiyaba elaluaibao.

<sup>20</sup>Tiali goli te tiwai me egobeo. Mu menio. Te Krais isali, tama mu tama Godigo aga te isai we bidi tomodu ma hodolali. Aga te isali we bidi dabe hodalomainogo te hasia polasa hodaluai bidi aga dao. Tama te gide nai inabo hasia pedalali nai tiwai aga te gų pagede hasia mu ma pedalai dao. Tama tibaso, dago koneani, agade konealubo po dađ wali we bidi tigidali augwali me te Godigo ma hodolaibao.

<sup>21</sup>Magi baso meni, te bidi deli Adamgo yali şede tedu te isibo kolesaga pedalali, tama te tiwai me te gasa bidi me deli Kraisgo yali şede te isai bidi ma hodaloabo kolesaga me pedalalio. <sup>22</sup>Te e tama tiwai: te Adamgo bulai wai augwali tigidali isibo bage dao. Tama tiali goli Kraisgo we bidi hani augwali tigidali bidibo ula saibao. <sup>23</sup>Tiali goli da tigidali we



bidi deli deli te da ma hodaluuama, tama dena sogo tede te bidabo ula saibao. Te hasia bolo polalubo te KraiS aga ma hodaluuama tama bidabo ula sai dao. Tama nosali aga ma asobo sogo, da aga hani tigidali ma hodaluaibao. <sup>24</sup>Tama te sogo tigidali nai silaibao. Tama KraiSgo te gavman şe tigidali silibadi, tama te haniani tobolu bidi şe ebo tigidali badi, tama tigidali bomu dola silibadi elama, tama agai aga tigidali nai tonalubo bomu me ula te Aya Godigo nogoba muaibao. <sup>25</sup>Magi baso meni, KraiS te tuni bidi bidimainu eyu, tama bidada pidubadi tama Godigo te boi bidi tigidali augwali aiyaba elaluama siligi pabo si usu nigi paibao.” <sup>26</sup>Agai te gasa boi bidi dabe augwali tigidali dolobode da, teda agai te isibo kolesaga me sia saibao. <sup>27</sup>Magi baso meni, te Godigo po bukude te tiwai po wai, “Godigo tigidali nai te aga dologode muaibao” wai. Te aşani pode te Godigo tigidali nai te KraiS dologode muaibao po wai. Tama tialima dago hania koneani, Godigo tigidali nai te KraiS dologoba muani, tiali goli God aga digi te KraiS dologode me bidigobeo. Menio.” <sup>28</sup>Tama nosali Godigo tigidali nai KraiS dologode munama silibo si da, teda God aga Ogwa digi te God dologoba pelama, te tigidali nai aga dologoba munama, tama God te tigidali nai dali, tigidali we bidi dali tobolu bidi mu bidimainogo yaibao.

<sup>29</sup>Edao. Te Godigo te bidi dabe te gu pagede ma hodaluaibao po te mu po menigi sogo da, magi baso te meba bidibo bidigo te isali bidi tau somainogo eyu baptais sabo dawe? Te mu tama te isai bidi munu me ma hodalugobe da weyu da, teda magi baso te isai bidi dabe tobade te bidibo bidigo augwali tau somainogo eyu baptais sabo dawe? <sup>30</sup>Tama ena dali, te ena dali deli şe ebo bage me, da me sesemane sogo bidi mebago da dolainogo ebo dao. Te isai bidi ma hodoligi menigi sogo da, teda magi baso da e tiwai bidaibawe? Te isai we bidi ma hodoligi menigi sogo da, teda te Godigo pode boi bidi homu ebo bagego da dene me maidali weyu dago e şe tagaligi da. <sup>31</sup>Ama dedeo, te tigidali sogo te ena dali boi homu ebo bagego dene mabo homu ebaso, te tigidali sogo deli deli ena isigowe, te eno konesiabadi ena tama bidibo dao. Te po mu po naga dao, te eno dagede ebo homu te mu tama dao tiwai. Mu tama, da tigidali dago Genuai Bidi KraiS Jisasde tia selama bidibo tama eno wiegi yai homu pemene dagebolo mu ebo dao. <sup>32</sup>Ena e moni hanu Efesusde polobadu bidibadi, te Godigo pode boi bidi homu ebo bagego ena dali dwai şe yali, augwali te bulude bidibo dwai hui digi ebo hasa dabe tiwai yali. Tama eno tşde bidigo homu wali naga pigi sogo da, teda te seşe tolubogo ena mena tama tau sogowe ena te homu egi da. Tama tiyu, mu tama te isai bidi dabe ma hodoligi menigi sogo da, teda “Da do ma tamadi isibaso, tagalao, dago te nai me weş me subigila tuinao,” te homu egi dao.”



<sup>33</sup>Augwaligo dage te tobage tibo po ola mabo gogolamuo! Bidi me deligo te dwai kolesaga ebode polobadu wali po te mu po naga dao. Agai te po wai, “Te da dwai bidi dabe dali kisasa biliyu da, teda augwaligo dwai kolesagago dago wiegi yai kolesaga ebo dolaibao,” agai te po wai. <sup>34</sup>Dagego te wabo pabo kolesaga tagalama tama dolo homu kolesaga yao. Dagego dwai şe ebo tagalişo. Dagego odao. Dage tomode meba augwaligo te Godigo te isai we bidi ma hodalugobe po wabo bage, augwaligo God kuna konebeo. Te dage hale ilainogo eyu eno te po dagebolo obao.

### **Te isali tigi gasagi yai ma hodaluaibao**

<sup>35</sup>Tiali goli bidi me deligo te tiwai po hanalu waibao, “Te Godigo po wali pali isai we bidi dabe augwali mena tama hodalugowe? Te augwali mena tiwai tigi selama ma hodalugowe?” agai te po waibao. <sup>36</sup>Te eno te po wei ponoyu e po obao: nage kolesaga meni yai bidi dawe? Nago hanalu wali po si te kidu meni yai po naga dao. Naga digi te nai yiyu ge bulubo naga koneani, tama te nai ge bulama tama tş tomode te ge peda pelama tama kulubi holisiayu da, teda te holabo yiyu aga bidabo ula me sogobeo. <sup>37</sup>Tama nago te ge naga bulubo dao, te nosali pedalobo sese nai tigi bulubo meni. Te menio. Nago olo ge naga bulali, te yiyu ge, ma gasa nai ge me te olo ge naga bulubo dao. <sup>38</sup>Tama Godigo digi aga homugo te yiyu gede pedelabo yabe dodolama nigali, te aga digi homugo koneama te tiwai yali. Tama agai haniani yabe te haniani nai wai tigidali deli delibolo mabo dao.

<sup>39</sup>Tigidali tşde elalubo naigo tigi te deli nai tigi tiwai naga me elalubeo. Menio. Te bidigo tigi gasagi yai me tedali elalubo, tama hasa dabego gasagi yai me tedali, tama ba dabego gasagi yai me elalubo, tama şuş dabego me gasagi yai tedali tigi elalubo dao. <sup>40</sup>Tama dagalude nai dabe me tşde nai dabe me tedali elalubao. Tiali goli te dagalude nai dabego au yali te deli tigi poai elalubo, tama tşde nai dabego au yali te gasagi yai tedali elalubao. <sup>41</sup>Te giligago au yali te deli tigi poai elalubo, tama poluago au yali te gasagi yai me, tama te hş dabego au te gasagi yai me elalubo. Tama hş dabego au me te gasagi gasagi yai elalubao.

<sup>42</sup>Te Godigo te isali we bidi dabe ma hodolobo kolesaga me, te tiwai naga yaibao. Te tigi dago te nai ge tiwai pubalobo, te dolaibao. Te ma hodalobo tigi te gasagi yai dao, te munu me dologobeo, te gamonabo tigi dao. <sup>43</sup>Te tigi dago pubalobo, te sawi isşwai dwai mu yali. Te ma hodalobo tigi, te wiegi yai sawia pai mu yaibao. Te dago tşba pubalobo tigi, te bomo me elalubeo. Te ma hodalobo tigi, te bomo hauwa elaluaibao. <sup>44</sup>Te tigi dago pubalobo, te tşde bidabo tigi naga pubulaibao. Te ma hodalobo tigi, te dagalude bidabo tigi elaluaibao. Te tşde tigi elalubo, tama tibaso dago koneani, te dagalude bidabo tigi me elalubo dao. <sup>45</sup>Te Godigo po bukude aşani pode me te tiwai po wai, “Te polasa hasia bidi, Adam, te bidibo ula elalubo bidi pedalai,” te

po aşani. Tama nosali mu pedalali Adam aga te bidibo ula mabo mobo bidi pedalali.<sup>x</sup> 46 Tiali goli te bidibo ula mabo mobo bidi te hasia me pedalobeo. Menio. Te e tõe bidabo ula te hasia pedalali. Tama bidibo ula ebo mobo bidi noma te nosali badu pedalaibao, aga te tõe bidabo ula hasegelaibao. 47 Te hasia polali bidi Adam te e tõe bidibolo polali. Godigo tõe naga aga nigali. Nosali pedalali bidi te agade Adam si wabo bidi, te aga dagalude bidai bidi dao, tedu asai dao. 48 Da tõe we bidi tigidali, da te Godigo te tõe nigali bidi Adam tiwai pedalali. Tama da Kraigo we bidi hani bage, da te dagaludu asali bidi Krai tiwai mu pedalaibao. 49 Tama megı da te Godigo tõe nigali bidi Adam tiwai dao, dago elalubo tigi te agai elaluali tigi tiwai si naga dao. Tama te tiwai naga me dago te dagaludu asali bidi Krai aga tigi tiwai naga digi dago nosali saibao.

50 Ama dedeo, eno megı wali po page e dao: te e tõe bidabo tigi naga elalubo bidi te Godigo we bidi tonalubo madide bidibo usu me egobeo. Tama te gamonasiębo tigde bidibo bidi me gamonogobeo.

51 Dagego odięo. Eno geme dualali po me deli dagebolo pusubao: te da tigidali me isigobeo. Tiali goli Godigo da tigidaligo tigi te hasegelama te gasagi yai tigi me pedalaibao, 52 polo mu, bidigo gedu gagamu ebo tiwai, te tõe dagalu si silibo sogo te bu wabo nai biugel po wabo sogo tiaibao. Awe, te bu wabo nai biugel po waibao, tama te Godigo po wali pali isali we bidi augwali gų pagede hodaluaiabao, tama augwali munu me dologobeo, te augwali gamonaibao. Tama da me bidibo bage, dago tigi hasegelama, gasagi yai mu pedalaibao.<sup>y</sup> 53 Te e tiwai: te dolobo tigi, te hasegelama tama te dolisiębo tigi pedalama, tama sesemane sogo bugagia bidimainogo emainao. Te isibo tigi te hasegelama, tama gamonabo tigi ulade bidimainogo emainao. 54 Mu tamao, te dago elalubo tigi, te dolobo tigi, te hasegelama sesemane sogo bugagia bidaibao. Tama te isibo tigi te hasegelama te gamonabo tigi pedalama tama sesemane sogo bidaibao. Te tebo sogo te Godigo po bukude aşani po me deli te usu nagasaibao. Bukude te po wai:

“Godigo te wębi hwęani bomo elama, tama te isibo kolesaga te aiyaba elaluama, tama tigidali mu silalio.”<sup>z</sup>

55 Bukude po me e tiwai elalubao,

“Nage da, isibo kolesaga, tama nago te we bidi aiyaba elalubawo sę mena elalubawo? Menio! Te mu silalio! Nage da, isibo kolesaga, te nago dene mabo bomo menawo? Te menio! Te aiyaba elalualio!”<sup>a</sup>

Te po bukude aşani. 56 Tõe we bidi augwaligo te isibode magı baso wi ebo dawo? Woo, augwaligo koneani, augwaligo dwai sę eyu bidibasao,

nosali augwali dene saibao. Augwaligo dwai şe yali, te augwaligo mena tama koneaniwe? Te Godigo Mosesbolo mani bomai pogo te dwai şe yali page augwali hania waselebo dao. <sup>57</sup>Tiali goli Godibolo dago puba hwi po wao! Te dago Genuai Bidi Jisas Kraisgo yali şede, te Godigo da bomobaso, tama dago te boi bidi, te isibo kolesaga, te dago aiyaba elalubo dao.

<sup>58</sup>Eno ama dede muo, te da nosali ma hodaluama tama tebogo te isibo kolesaga aiyaba mu elalubaso, megi dage bomu elama bidiyu, tama wi homu eyu dwasianu ibaba kila selamuo. Te dagego Genuai Bidigo şe dene ebo, te olo me tagalogobeo, te şe ebogo aga du mu walaibao. Dagego te tiwai koneama, tama sesemane sogo dagego dago Genuai Bidigo şede şe bomu mu yao.

## Polgo homugo mena şe dabe agai igi da, homu yali po

(Dqı 16)

### Polgo te Godigo we bidi tau sabo masigi po wali

**16** <sup>1</sup>Dagego ena te Judia tõe bidibo bage tau sabo masigide po hanalu wali. Megi eno te po wei ponoyu, dagego te sisinama Godigo we bidi augwalibolo mawainogo ebo masigi po wabo elalubao. Te şe yabo sunumi eno te Galesia moni tõe bidibo Godigo po odobo we bidi hani dabe augwalibolo ola mani, tama dagego me te tiwai gilama yao.<sup>b</sup> <sup>2</sup>Te tigidali Sande dage tigidali deli deligo te hasia Sarere şe elama sali mone tede homugo koneama, tama te bugulama tama me badu te duga bede bugagia munalumainao, te tiwai saboao. Tama nosali ena sabolobode, teda dagego augwali maiabo mone gegebo şe me egobeo. <sup>3</sup>Nosali ena dage bidibo digi sabolobode, teda duga digi te mone sela pabo bidi meba nogo tı elama, dagego te tau sabo masigi dabe te moni hanu Jerusalemba sela pomainogo yaibao. Tama dagego pas dabe aşenama, tama augwalibolo menama, tama augwali teba tagala palaibao. <sup>4</sup>Tama ena me ena pabo homu ebaso da, teda augwali ena dali hodobo paibao.

### Pol pelama Korin dabe suainogo homu yali

<sup>5</sup>Eno tede şe me elalubaso, eno e bulu Efesus tagalama tama hasia ena te Masedonia moni tı pedai teba paibao. Te moni tı tomodu biliyu, tama tede eno şe silibo si, tama ena dage bidibo madi pedalaibao.<sup>c</sup> <sup>6</sup>Tama sabolama, tama ena dwasianu sogo te dage dali bidabo homu ebaso. Ena kuna konebe, te ena dage dali bidibadi te moni kedau ebo silibo sogoba

<sup>b</sup> 16:1 Rom 15:25-26    <sup>c</sup> 16:5 Tpi 19:21

usu nagasaibao homu yai. Tama nosali ena gasa buluba şe egi paibao, te mena bulu te megi eno konebeo. Tialima ena gasa buluba painogo ebode, teda dagego te pabo sunumiba ena odasa pelama, tama tau siyu tagaligi pagameo. <sup>7</sup>Ena megi te Masedonia tıba pobadi ena dageba asigi sogo da, teda ena dage dali dwasianu sogo naga bidibo usigi da. Te ena hagelabo. Dago Genuai Bidigo usu da po obaso da, te ena Masedonia tıde elalubo şe silama tama dageba asama, tama ena dwasianu bobage sogo dage dali bidabo homu ebao.

<sup>8</sup>Tiali goli ena e Efesus bulude bidibadi te Juda dabego moni nai tubo sogo nogi Pentikos pedalobo sogoba usu nagasomainu homu ebo dao. <sup>9</sup>Magi baso meni, Godigo eno sunumi dalobaso, tama eno te we bidi hauwa te Godigo po wali pomainogo tau sabo şe genuai elalubao. Tama ena dali boi bidi homu ebo bidi dabe me hauwa ede elalubao.

<sup>10</sup>Te nosali Timoti dage bidibo madiba pedalobo si da, teda dagego bugagia tonalu te aga dage tomode wi isayı homu nagame elama dua digi bidimainao. Magi baso meni, agai Genuai Bidigo şe eyu, te eno digi ebo şe tiwai ebo bidi dao. <sup>11</sup>Tama tibaso, bidi me badugo aga te olo nai tiwai bidi da homu eyu, tama aga tudiba me munamuo. Menio. Dagego aga homu nagame ilama, tama nosali aga te enaba asabo sunumiba bugagia tagalagaselama, tama aga ena pageba asomainogo yao. Eno te ama dede meba dali aga asobo tonaluaibao.

<sup>12</sup>Tama dago ama Apolos, te agade po te tiwai dao: te hauwa sogo eno po agabolo bomo elama weyu, te aga ama dede dali augwaligo dage suagasomainogo po wai dao. Tiali goli aga pabo hagela homu mu yai. Nosali, te aga pabo sogo suali usu ebaso da, teda aga dageba sabolagasaibao.

### Po silagasu wabo po wai

<sup>13</sup>Dagego bugagia tonaluyu, tama te Kraide konealubo pode bomo elama bugagia dolaluo. Dage bidi mu sesemane sogo bidiyu, tama bomo elama bidaloao. <sup>14</sup>Tigidali şe dagego ebo, dagego dwagi yai homu te Godibolo me te we bidi dabe augwali dali eyu, tama dagego duga şe tigidali iduao.

<sup>15</sup>Ama dedeo, dagego te bidi Stefanas dali aga hani dali koneani, augwali te gasa Akaia tı pedai hani bidi dabe augwaligo Godigo po wali pabo gagalışbadi te augwalibolo polasa te Godigo po wali pabo hani we bidi pedalama tama megi bidibao. Tama augwa digi homugo augwaligo te Godigo po odobo we bidi augwali tau sabo şe salio. Eno homugo dage te tobage we bidi augwali <sup>16</sup>dologode bidimainogo homu ebao, tama tigidali bidi dabego augwali tau selama, tama te şede şe bomo elama ebo dao. <sup>17</sup>Tama Stefanas me Fortunatus badi te Akaikus, te bage augwali ena bidibo madi asali, tama eno homu wiegi yai pemene yalio. Magi baso

meni, dagego ena tau somainogo eyu eba asabo te usu isabaso, tama augwali selago dage hasegelama, tama augwali ena bidibo madi asai dao. <sup>18</sup>Augwaligo ena homu me, tama dage homu me nagame ilali. Tama tiyu dagego te tobage tiwai bidi dabe augwali nogi ugwaba sao.

<sup>19</sup>Te moni t̄o pedai Esiade te Godigo po odobo we bidi augwaligo te giligade dao po dagebolo obao. Te Akwila de aga we Prisila dali, te Godigo po odobo we bidi te augwali sigo beba sisinibo bage, augwaligo dage dali dwagi yai homu eyu, dagebolo te Genuai Bidigo nogide siade dao po hauwa obao.<sup>d</sup> <sup>20</sup>Tama tigidali Efesusde bidibo ama dedego siade dao po dagebolo wali. Te da Godigo we bidigo kolesagade, dage tigidali deli deligo te ama dedebolo wiegi yai homu eyu augwali nogo mayao.

<sup>21</sup>Ena Pol da, te ena digi eno nogogo te siade da po aşena dagebolo tolobao. <sup>22</sup>Bidi me deli aga homugo te dago Genuai Bidi Krai dali dwagi yai homu ebo hagela homu eyu da, te bidi agabolo dwai şe pedalomainao. Genuai Bidi, nage asao!

<sup>23</sup>Te eno homugo te Genuai Bidi Jisasgo olo tau sabo wiegi yai kolesaga te dage dali bidao.

<sup>24</sup>Te Krai Jisasgo yali şede te da tigidali hodobo deliba wadoloyu bidibo dao. Tama tiyu, eno dage dali dwagi yai homu eyu godolo eyu bidibao.

---

<sup>d</sup> 16:19 Tpi 18:2